


特 別
^18
4892
23





18
4892
23

明詩綜卷六十五

小長蘆

朱彝尊

錄

陽平

成文昭

緝評



錢允治

九首

允治初名府後以字行更字功父長洲人穀子
有少室先生集

靜志居詩話功父勤於
汲古詩篇特勝乃翁

題寒林鍾馗圖

千林木落歲欲更雪深雲黑啼颺颺耗鬼爭出噉人食
南山老翁知姓名袖中三尺秋水清攝衣潛向林中行
一時妖孽屏跡盡喘息不敢低出聲只今如何復縱橫

盤踞津要如堅城那得老翁刈雙精磔裂血肉藏鉗罟
坐使天路平如衡郊原林木連理生麒麟鳳皇兆太平
春臺熙熙日月明

春暮治平寺

經年不到湖上寺今日偶停山下舟碧山老僧往何許
紫薇舍人碑尚留樹杪忽驚湖在眼山坳却喜塏當頭
藤花開徧竹迸笋惜別步步空含愁

茱萸灣

吳王渚運
盧舊河

茱萸灣頭雨乍晴廣陵城北田方耕小艇出港白衣濕
高樓開牕玉腕橫細草漠漠天際遠一水漾漾船邊清
客來空舉舊時話岸上垂楊蟬忽鳴

同汪魯二將軍登寶山看海

地軸東虧接混茫空明何處是扶桑青山一點孤城黑
碧月半輪殘照黃橫海樓船天漠漠隔沙烟樹水蒼蒼
野夫却喜狼烽息醉飲將軍寶纛旁

送謝友可守順慶

五馬翩翩向益州三巴風景句中收天邊山色隨人轉
樹裏江聲繞郭流諭蜀有時還草檄籌邊無費亦登樓
故交零落雙魚遠別酒殷勤勸不休

聞柳陳甫客塞上寄憶

一宿齋頭馬遂西秋風紫塞陣雲低黃鬚未學鮮卑語
丹竈誰封太乙泥此去可經藏甲隲何時重過浣花溪

明言卷之十五
二
宵來明月殷勤照霜落軍城聽鼓鼙

喜汪伯耳自桂林歸見過

金雞未放詎言歸細雨衡門忽款扉萬死可憐惟舌在
一官寧論與心違藤江瘴癘人行少桂嶺風烟客住稀
相見祇疑如夢裏濁醪不醉淚沾衣

寧夏兵變十韻次馬雲卿

要地鄰降帳戎心啓弄兵一時虧廟算萬里壞長城
削邊臣策艱難列較營自來愁債帥因此笑書生
觀望憂臣主安危係重輕變生元有兆事啓孰無名
聲罪勞天討知人荷聖明一夫懷憤發何日克期平
紫塞消鳴鏑形庭罷請纓杞人東海上日日望澄清

楚江秋晚

揚帆指洞庭忽捩君山舵日出清霜稀秋江月方墮

周履靖一首

履靖字逸之嘉興人有梅墟雜橐

詩話逸之夫婦能詩門內唱和鈔撮巨門廣牘
刊行亦好事者流蓋先寒山趙凡夫偕隱者

江上竹枝詞

夜來春雨溢春田江上蘼蕪遠接天赤脚漁娃晨入市
柳條帶雨串銀鱗

游及遠四首

及遠字元封閩人有小竹林草

曉發九牧嶺

嘶馬促行役出門星月稀松風吹短鬚竹露濕練衣鑿
水秋容淨緣厓足力微鄉關今日盡愁對嶺雲飛

野鹿園雜詠

潭水瀏其清芙蓉亂紅影白鴈一聲秋蘆花明月冷

汝陽曉發

殘月挂高樹秋林生遠風淒涼千里色都入客心中

醉中辭竹軒宗侯

夜雨度花谿風花踏作泥惜花頻喚酒未得過城西

潘之恒 二首

之恒字景升歙人有金閭東游涉江諸集

聽錢二弟子馬生奏曲

鑾江侍女競雙聲半入吳城半越城總是西施歌舞地
江南何處不含情

春雨

流水浮香送画船凌波何處不堪憐西來一片橫塘雨
淨洗花容分外妍

唐時升 十首

時升字叔達嘉定人有三易齋集

王辰玉云叔達五言古高閑遠淡以

方儲韋不帝過之七言古步驟老杜乃專肖其神情五七言律出入王右丞劉隨州間錢受之云叔達詩皆放筆而成語不加點過其得意才情騰發雖苦吟腐毫之士無以加也其文縱橫踔厲深惡艱深塗澤之作自命其集曰三易四明謝三賓知縣事合孟陽子柔長蘅之詩文鏤板行世題曰嘉定四先生集

詩話嘉定四先生詩文要當推叔達第一長蘅子柔且遜席矧孟陽子牧齋謂其放筆而成繹其辭乃追琢而出者由其欲伸孟陽故有意抑

之爾

園中

四首

鬱鬱千尺松所憂斧與斨離離三寸草所患牛與羊聖賢逢濁世處身復何當高明畏摧折忠信虞毀傷禍福誠無門天道寧有常幸逢小豐歲得飽無太康謹身以節用暇則談先王為善實良圖敢謂有餘慶

鶴鳴在林樾山谷有遺音置之闌闔間三載如病瘖禽鳥自有適人亦自有心嗟余實鄙夫翰墨非所任廢書動旬月篇籍凝塵侵唯於場圃內時時發長吟澹如酌玄酒鏘若調素琴為語二三子幽賞宜共尋

魯國有嫠婦太息有餘悲豈惟憂宗國我愛我園葵憶昨三韓外六載懸王師太倉三百萬輦送滄海濱今聞五將軍肆伐西南夷狐兔戀窟穴此豈關安危傳聞中朝議何當恤瘡痍戎車久不駕今且數驅馳六軍百戰後但恐中土疲吾聞聖人言佳兵不可為

梅實須五春橘實須六秋人命須臾間敢保數載謀鄰叟笑謂余君言何謬悠苟非勤封植白首見無由因思包山麓終日長夷猶既無買山資曷不營故丘樹茲歲寒安散布林塘幽繁英媚雪下美實隨霜收豈必黃髮期會見蔭平疇叮嚀語穉子籬落須綢繆

阮氏還居尉氏

阮公嘯詠處千載思其人白雲在天際窅窅不可親嗟

哉大賢後風流尚未泯卜築丙舍旁臨眺蓬池濱
松柏古庇此榱桷新我有一尊酒助子霜露晨路遠莫
致之眷眷含悲辛不知古戰場猶有劉項塵詠懷如有
作寄我開心神

宿直塘

雨後稻梁好霜前魚蟹饒密藤全隱壁枯柳卧成橋
樹裏方爲市籬間暗上潮田家秋作罷燈火各相邀

漁陽

住久漁陽郡朝朝望白檀朔雲秋色早邊月夕光寒
館伴能番語降軍學漢冠人傳魏武帝於此破烏丸

薛侍御出按貴州便道歸雲南省觀

繡衣持節出長安南入牂柯路萬盤重箐濕雲常欲雨
點蒼晴雪不知寒登車自埽豺狼跡遇客爭彈獬廌冠
遙憶樹頭新酒熟刺桐花下正承歡

田家即事

橫塘潮急進船遲菱苻纏絲荷葉覆魚先入市
青楓渡口曬鸕鷀

舟中即事

風卷黃河兩岸沙中流艇子一時斜故園柳絮應飛盡
河北行人見雪花

婁

堅 五首

堅字子柔嘉定人貢生有吳歛小草

詩話續川三老
子柔古風獨勝

祁之柳二章分寄君實伯隅

祁之柳其葉油油自我送子于祁之洲佇立望之莫知
我愁豈不能言以寫綢繆我言斯永我心則憂乃如之
人洵美且修我之所臧人以為尤

祁之柳其葉爛爛自我送子于祁之畔佇立望之莫知
我忍豈不能言以寫嘅歎我言之長我心則亂乃如之
人洵美且燦人之所榮子以為患

巢湖

巢湖雖云險曠焉豁心胷於時雪初霽山高玉龍從衆
山亦灑迤拱揖相為容風帆頃刻過我目不得窮但見
連檣來橫亘若垣墉忽憶草昧初義師起從戎至今廖
與俞廟食崇元功奈何濡須塢紛紛鬪梟雄非無爪牙
士所攀非真龍信知聖人作萬象開晦蒙

登虎丘寺閣

茲山寶薈蔚能使流目迷高閣出樹顛連峰亘其西平
生山中客今來始攀躋浮圖勢更高登之憚層梯聊此
牕間眺已覺飛鳥低平疇帶曲水遙見來時蹊高下各
有適物理將無齊

荅辰玉

憂來信無方奈何不自遣本無當世志食貧自黽勉生
人重嗣續吾後乃連蹇回思造物然有淚不令兹子意

吾能知浮雲有舒卷不然憂蒼生痛憤在僕淺我聞同心人出處多異撰

程嘉燧八首

嘉燧字孟陽休寧布衣僑居嘉定有松圓浪淘

集

錢受之云孟陽以唐人爲宗熟精李杜二家深悟剽賊比擬之謬

五言近體約而之隨州七言近體放而之香山晚年盡覽遺山道

若親炙古人而面得其指授者余故援裕之中州集例諡之曰松圓詩

云 詩話孟陽格調卑才庸氣弱近體多於古風七律多於五律如此伎倆令三家邨夫子誦百翻兔園冊即優爲之矣必讀書破萬卷乎牧齋尚書深懲何李王李流派乃於明三百年中特尊之爲詩老六朝人語云欲持荷作桂荷弱不勝梁欲持荷作鏡荷暗本無光得毋類是與姑就其集中稍成章者錄得八首

平望阻風

驛路連吳近鄉音帶越稀寒流捎宿舸夕浪急風扉
市求魚入鄰舟得酒歸微微掩明燭伏枕念無衣

送叔達之錢唐

夜雨維舟數秋風解袂輕相逢留容住同作送君行
月色湖中寺潮聲江上城知君游賞處相念若爲情

四明徐匯陽莊太峰余泰靈秋盡先後別歸送行
相逢多別酒歸路欲何之江水曹娥廟湖山賀監祠鄉
愁兼雨重旅望入秋悲儻憶江東侶論文復幾時

七夕懷平仲揚州

江邊一別兩悠悠湖上相思且滯留千里星河同此夜
廿橋明月自三秋無由結伴還鄉國况欲因人作遠遊

明言錄卷之五
潦倒更於何地會見君空已雪盈頭

送徐女廉之無錫

黃姑灣頭梅乍香黃婆墩邊柳漸長但看音信連三月
誰道風烟不兩鄉

雨中過伎家飲書贈陳翠

紅樓細雨燕飛斜玉面珠簾相映遮三月江南春色盡
却行江北見梅花

憶金陵

青門楊柳白門烏秋雨秋陰舊酒壚何處蘼蕪最相憶
縑絲風雨暗西湖

崑山響梵閣懷季常上人遊九峰

袈裟相伴踏清秋健即閒行懶即休記得罷琴吹笛夜
雨中茅屋小如舟

吳夢暘 三首

夢暘字允兆歸安人有射堂詩鈔

詩話虞山錢受之謚嘉定程孟陽曰松圓詩老謂能照見古人心髓若親炙古人而得其指授歎為古未有新安閔景賢輯明布衣詩推歸安吳允兆為中興布衣之冠是皆阿其所好不顧千秋之公是非以余觀二子之作以政則魯衛以風則曹檜陳詩者不廢斯幸矣

送張去華走哭汝陽王胤昌宮庶

君不見南州孺子辟不起一朝徒步走千里英雄但可
輕浮名那可無心報知己張郎心事亦復然絮酒持將
哭泉裏自言不受他人知惟有汝陽王庶子出門滿路
吹蒺藜眼底誰為此入死更將肝膽何處明一片悲風

咽汝水

送胡孟弼邑博之沅江

攜手情無極茫茫此別何一官猶俎豆滿地已干戈畏
路身難定騷人怨自多可堪寥落思木葉洞庭波

秋草

八月幽并百草黃還聞一曲奏清商關河今夜皆寒色
陵寢前朝但夕陽久客自然迷道路後時能不畏風霜
吳兒莫說漂零易未到邊頭古戰場

謝兆申 一首

兆申字耳伯邵武人有謝耳伯全集

詩話晉江黃監丞明立序耳伯集稱其喜交異人購異書撫異聞自墳
典丘索經緯流略釋官瓌語靡不甄錄交游既廣橐中裝半以佞佛半

以市書有三十乘留僧舍已散佚予嘗入闕購其手鈔張伯雨詩與世
所傳者迥別惜乎三十乘者悉蕩為烟塵矣耳伯詩非不銳意法古奈
其辭鬱而不舒蓋耳伯踰嶺游吳首以詩文請業於劉子威
未免問道於盲宜其所就止此學者擇師誠不可不慎爾

別意

我行且登舟子莫徒離憂眷眷戀我側去去難久留歎
息成參辰愁思不可抽丈夫在四海譬彼水浮舟聚散
無定期感子敘綢繆

王野 三首

野字太古歙人有覺非齋詩爨餘橐

雨雪曲

大漠雪漫漫天風入箭瘢平明沒馬足半夜折旌竿聲
疊鼓輦暗光添劔戟寒鐵衣三十萬誰不憶長安

寄叔祖仲房

燕趙歸來二十春重遊吳楚白頭新如今海內無知己
到處江山哭故人

征夫怨

黃雲白草沒燕山百戰空存兩鬢斑試問征夫三十萬
幾人生入玉門關

范 洵 十三首

洵字東生烏程人有范東生集

吳凝父云東生苦吟收視及聽馳情結思不傷古不緣今一字未安寸心幾嘔蓋神於法者 錢受之云自王李之派盛行海內幾於糜爛相去四十年而能始起閩非熊起新安允兆東生起茗上凝父起吳中希風抗志在大曆元和之間清新安雅彬彬相命進而之古有其端矣 姚園客云范東生詩如楊柳當風嫋嫋不態 韓子蓮云東生論詩不可一世意所不協張髭怒目誦論 詬評及其苦吟收視及聽思極宿冥多清微簡遠之句

詩話東生詩才嫺雅如靈犀結佩可以 辟塵方之孟陽允兆諸君覺尤騰拔

采蓮女

采蓮女采蓮涉溪水寧采田田葉采葉蓮有蕊莫采亭
亭花采花蓮無子

簡鄧遠游

日日何所待旁人應見猜油然碧草外獨上姑蘇臺西
子邈已去東風空自來茸茸桃李樹為問幾枝開

琴川夜泊懷孫齊之

野宿次鳧鷖青青荻笋齊潮痕隨月落山勢壓城低殘
夢風前柝歸心曙後雞還知高隱處只隔水東西

荆南送姚百雉還莆中

自蜀經三楚由吳下七閩到家君有日泥殺滯留人

盱江對月

新月出江干郵亭獨倚闌別家如昨日二十一回看

閩宮詞

二首

露華如水蘸宮牆紅豆花兼荔子香多少蛾眉閒待月
九龍帳底貯歸郎

四條絃上按新聲半是先皇手教成舊事內人誰敢洩
春來燕子不呼名

送一公還天界寺

江流汨汨樹層層短笠空瓢去秣陵依舊青山風雪裏
華門深掩一龕燈

荆溪

亂水聲中繫艇斜月寒沽酒叩誰家仙源咫尺不知處
紅葉吹來如落花

春日訊吳允兆

遠樹微波黯不分闔閭城畔寄孤雲春來儘有還鄉夢
除却青山便是君

仲冬

仲冬之交氣不齊桃花李花開滿溪行人認是二三月
祇少黃鸝枝上啼

遇俞獻父

與汝垂髫共里閭別來不省六年餘情知一見又成別

猶勝逢人數寄書

松陵舟中遲錢受之太史

幾家閒夜停機杼
支枕蓬牕風許許
吹盡蘋香不見人
繞塘寒月鷓鴣語

吳鼎芳 三首

鼎芳字凝父吳縣人後為僧名大香字庵藍居

烏程之霞幕山與范汭交有披襟唱和集

錢受之云凝父

與葛震父稱詩於兩洞庭皆能被除俗調震父晚自信不篤頗折入於鍾譚而凝父蕭閒簡遠迥出塵瑤之外 韓子遜云東生苕產而僑寓吳門凝父吳人而栖禪苕上東生好浮大白萬談雄辯凝父丰神蘊藉恬淡寡言其蹤跡雖殊而論詩相若

靈峰山房夜起

寥寥青蓮宇起步夜方永
蟲鳴四山秋鹿飲一潭靜圓

月當碧空孤塔立無影
花落樹猶香竹深澗亦冷
少焉雲英散明星上高嶺

雨渡橫涇懷孫惟化

東風作冷石湖船節屆清明
倍可憐一日客程偏遇雨
幾家茅屋不生烟野田水綠
迷楊柳古廟花深出杜鵑
寂寞橫塘人去後吳姬歌舞
自年年

北菴夜歸

欲暝未暝聞菴鐘出林入林
辭遠公亂峰幾點白雲外
古路一條黃葉中版屋已高
隔水月布帆正飽還山風
孤雛老樹自深夜襪綻突兀
柴門東

吳兆 十一首

明詩總集卷之五
三
兆字非熊休寧人有金陵廣陵姑蘇豫章諸臺

曹能始云非熊古詩學謝靈運沿及盧駱近體學岑嘉州字句少實錢受之云非熊詩早年穠華婉至中歲清真瀟灑大要沉酣於六朝三唐而傳之以性情幹之以風調工力並深與象兼會姚園客云吳非熊詩如清猿夜嘯斷續淒人詩話非熊清而能麗綺而不靡最見賞於石倉其風調亦相儷

阻風湖口登石鍾山作寄白下知己

川長已積勞風阻漸成疾離舟步少舒登山脰可引峰
垂似倒蓮石起如抽笋匯澤蕩無際潯江眺不盡烟含
楚岫微風送吳舫緊枝響山鳥聚葉密巖花隕渺渺春
目傷悄悄旅懷愍攘攘既獲譏栖栖亦負晒巖穴有遺
志寄我同心允

秋野閒行歸而有作

早穀已登場晚禾尚栖畝欣欣足慰饑望望非吾有荏
苒十年間蹉跎東西走結交吳楚士氣味少淳厚徒令
田園荒轉與琴書負歸來掩荆扉趨向寡親友日月忽
已除秋氣凋榆柳卒歲何寥寥涼風吹戶牖念往固已
遷嗟今將何守勗哉黔婁言斯志儻不苟

錄別

行舟櫂已駕斯須不相保弱子纔一齡就我懷中抱念
此傷人心皇皇何足道如何故鄉生不向故鄉老

春游曲

細雨濕春泥流鶯幾樹啼東風淮水曲落日長干西夾
道看馳馬圍場下鬪雞倡樓今夜醉月出管絃齊

西河子夜歌

新著杏紅衫試騎赭白馬馬驕堤路窄急為扶儂下

寄林古度

一與西湖別春風兩度來曾栖山寺裏日日待花開

登釣龍臺

秋色延高臺臺荒廟亦冷兩三樵牧兒投石試深井

姑蘇曲

寶帶橋邊鵲啄花金閨門外柳藏鴉吳姬卷幔看花笑
十日春晴不在家

暮春溪居

門前梧柳長新圍雨暗空林客到稀幾欲持竿溪上去

灘頭昨夜沒漁磯

秋思

蒹葭霜冷鴈初還歸夢如雲只戀山一夜潺湲西澗雨
夜來秋氣滿人間

送友人游燕

離筵別懼暮江濱紅樹青山映白蘋一過江南風景異
兩行衰柳送行人

沈野四首

野字從先吳縣人有卧雪閉戶燃枝榕城諸集

詩話從先賣藥吳門曹能始賞其詩延致石倉園題所居之室曰吳客
軒寒食絕句云驚心芳艸上河橋雨後推牕見柳條廚下從來烟火少
不知寒食是今朝最為詩人傳誦按孟雲卿云貧居往往無烟火不獨
明朝為子推伍唐珪云慙媿四鄰教斷火不知廚裏欠無烟則前久

已道之矣其樂府能
盤硬語頗饒古意

短歌行

推絃拂柱歌我浩曲浩曲未歌腸中躑躅河中有船不
載客還尊中有酒不令客歡世人結交安得常好他鄉
寄食安得常飽士貧者賤客久者貧不如歸去偕我故
人

子夜歌

門有車馬客姊妹易衣裳儂有好顏色那在紅粉妝

團扇郎

皎皎合歡扇郎持贈所歡本欲圖親近翻掩桃花顏

邊詞

塞上風高獵馬稀天山六月雪花飛閨人不解征人苦
直到隆冬始寄衣

石 沉一首

沉字灑仲如皋人有白雲居士集

錢受之云白雲居士集二卷灑仲沒

後萬曆庚戌歲友人殷之澤所定其詩陶冶性情蕭閒疎放超然自
遠不可羈泄雅以寒山擊壤自命吾則以為古之香山今之江門也

江門

何處春偏勝江門自好風酒旗斜路口花信短牆東多
病一居士丫鬢雙小童題詩嵩雒去可是白家翁

秦 鎬一首

鎬字京汝南諸生有頭責齋詩

詩話素小修序頭責齋詩有云今人字皆兩字而京字獨一字自東漢
以下無之矣然自漢以降如顏之推字介李曇字雲劉乾字天羅靖字

得顧朗生書

禮房玄齡字喬顏師古字籀張巡字巡孫晟
字鳳李條徐倫字堅毛欽字傑正難悉數也

憶別如今日風霜歲五除亂雲長短夢斷鴈有無書江
暖漁揚子原荒獵孟諸相看衣帶隔獨立野躊躇

米雲卿五首

雲卿字君夢湖廣人或云汴人徙家蘭溪後徙
居歸安之埭山

詩話君夢晚寓吳興往來無定跡其撥悶詩云十年湖上社雙
屐柳東山有子癡難教無家老不還後卒于埭山之枯木菴

詠荆卿

荆卿本神勇意遠度亦別酣飲燕市中歌哭以為節何
期燕太子螫折來相結禮殊報應重義感心遂熱紅爐
淬匕首繻縷試人血秦庭計不諧易水無留轍天命不
可為劍術何巧拙

歲暮江行

江海迷津日冰霜卒歲時天昏歸鳥急川霽落帆遲故
國書空返窮塗道益界坐來風雪變愁白鬢邊絲

澱水移家

移家東郭十年前東郭移家又十年忍割烟蘿還地主
笑驅雞犬下江船鷓鴣原上風偏急烏鵲枝頭月正圓
臨發不禁回首望并州桑梓自堪憐

秋柳二首

搖落天涯正此時蕭疎多見路旁枝一朝染露全無色

何處含烟尚有絲漢苑也應隨日短隋堤難道入秋遲
陰陰滿眼河山暮愁絕那堪帶雨垂

一夜西風那便凋他鄉何處不蕭蕭依稀有葉還無葉
搖落長條復短條難忘折來情脈脈更愁看去路迢迢
經過若問傷心地涼雨寒烟鎖灞橋

徐允祿 一首

允祿字汝廉蘇州嘉定學生有思勉齋詩編

錢受之云天啓辛酉予官詹端汝廉貽書累萬言謂正統己巳之役徐元玉得謀國大局而于廷益為孤注公等當早決大計勸請南遷定商家五遷之議勿為宋頭巾所誤甲申三月大命以傾豈知憂危庸早乃自二十年前一老書生發之其風義有大過人者詩話汝廉抗言持論具有經世之術詩則非其所長

贈丁長孺中翰北上

浮雲滿天地君子意何如容容不可為矯矯亦多虞長
路自此始願言遵康衢安得執鞭弭從子以前驅

商家梅 一首

家梅字孟和閩縣人

得家書

忽見平安字封題是老親自驚為客久不敢述家貧松
菊縱多故路塗惟一身臨風應不盡還問寄書人

宋 珏 一首

珏字比玉莆田人國子監生有遺橐

錢受之云比玉信腕疾書不加持擇

泊皖城三日懷白下故人

城依碎石岸依沙行遍城南之酒家日暮客愁如白下
荻花風起似楊花

徐 燝 十二首

燝初字惟起更字興公閩縣人有齧峰集

錢受之云興公

博學工文善隸書萬曆間與曹熊始狎主閩中詞盟後進皆稱興公詩派南損齋云興公聚書至數萬卷所居齧峰麓客從竹間入環堵蕭

然而牙籤四圍縹緗之富卿侯不能敵也其考據精覈詩自樂府歌行及近體無所不備

詩話嚴儀卿論詩謂詩有別才非關學也其言似是而實非不學牆面焉能作詩自公安竟陵派行空疎者得以藉口果爾則少陵何苦讀書破萬卷乎興公藏書甚富近已散佚予嘗見其遺籍大半點墨施鉛或題其端或跋其尾好學若是故其詩典雅清穩屏去懶浮淺俚之習與惟和足稱二難以此知興觀羣怨必學者而後工今有稱詩者問以七略四部茫然如隨雲霧顧好坐壇坫說詩其亦不自量矣

感秋

朝出北邙山夜歸北邙路北邙草芊芊累累總丘墓傷

哉九泉人一去無回顧往者既如斯來者復如故知愚
雖異類薶骨只數步貧賤何足悲富貴何足慕寄語賢
哲士令名自當務

投宿山家

清流抱孤邨秋意澹林木水急衝板橋山空響飛瀑殘
葉水邊黃危峰天際綠日暮何處歸人烟在修竹

送黃伯寵之秣陵

我從白門歸君從白門去去轍與歸輪相逢不相聚窮
冬百卉腓遊子遵長路黯黯鍾山雲蕭蕭秣陵樹峨峨
石頭城渺渺秦淮渡千里涉風波孤身犯霜露送子感
昔游勝事今成故離情不可緩慎毋垂尺素

送人臨邊

征馬嘶長路西山日欲斜送君臨絕域萬里盡風沙朝
氣摧秋草邊霜慘暮笳懸知榆塞上定憶故園花

宿界亭驛

兩月歌行役奔馳倦不勝澗多民病涉山疊客愁登百
草嚴霜殺孤亭驟雨崩五溪蠻地近明發到沅陵

驛樓送惟和兄北遊

夜靜江空欲上潮榜人催喚解蘭橈離腸禁得幾回斷
別夢不辭千里遙沙起交河陰漠漠風吹易水冷蕭蕭
關山迢遞何時盡此是他鄉第一宵

送康元龍之靈武

黃河官路黑山程羌笛橫吹漢月明漠北烽烟三里寨
隴西鞞鼓十年兵燕鴻度塞寒無影代馬行沙暗有聲
後夜思君勞遠夢朔風吹過白登城

送沈廣文擢德清令

新懸墨綬謝青瑣仙令栽花向雪川處處勸耕黃稻雨
邨邨收繭綠桑烟官清但飲雙溪水吏散閒尋半月泉
莫戀彈琴寬賦稅司農方急水衡錢

樵夫祠

十萬王師盡倒戈秣陵非復漢山河一時總逐新纓冕
何處能容舊斧柯莫考姓名垂竹帛空留靈爽在烟蘿
荒祠近對秦淮水誰與招魂賦九歌

宮人斜

空山冥漠夜沉沉多少芳魂不可尋
莫怨埋香在黃土長門深比墓門深

田園雜興

春流一夜水平堤菱葉縱橫荇帶齊
分付兒童須愛惜莫驅鵝鴨浴前溪

寄家兄書

年荒八口苦饑寒門戶支持事事難
藥債未還官稅迫封題空自報平安

汪逸二首

逸字遺民休寧人有逋屋吟

詩話遺民與馬時良仲良倡和里人目為華屋詩老

蘧公池上

園經一雨再雨水接西邨北邨牧子驅牛避道僧雛讓
鶴鷹門

丹陽道中別芳生

風過重陽易作寒去來俱泊此河干無端別路舟車異
一日楓林不共看

徐應雷一首

應雷字聲遠吳縣人有白毫集

丁長孺云聲遠詩本自然以率真見平澹

寄陸純孫

神魚樂深淵奚必易水淶威鳳集高岡奚必燕山岑登

臺眺大江蒼蒼楓樹林眷言懷吾友忼慨為悲吟鴻鴈
日南飛助我厲商音悲哉歲將晏况此天涯心

董斯張 十二首

斯張字遐周烏程人國子監生有靜嘯齋集

韓人

穀云先生泛覽百家窮窮二氏伐山網海洵不世之才詩
與年力相長不以風雨輟其音難與吳喉楚舌同年而語
詩話遐周初學詩於趙廣業及入閩心折曹能始歸與吳允兆王亦房
酬和是時公安景陵派盛行浙西風氣不盡移易遐周洽聞周見與吾
郡沈景倩略同詩亦相似嘗以所作投前守吳季駒季駒寫書韓求仲
云在郡兩年不識有董生吳興守眼可挾也近得滌見贈詩如飛天仙
人不著一烟火
字其傾倒若是

補昭人歌

人而無禮兮良足歎不見山中之狺狺口可以食亦可
以言

讀曲歌 二首

儂如一絃琴獨絲纏相交歡如雙耳鼓慮為他人搖
十日不窺牖後園花放齊薔薇刺儂衣蛺蝶投儂懷

過桐江

薄暮櫂歌聲看山不計程江晴船作市地僻縣無城蜃
氣連虹暗龍腥雜霧生釣臺猶可望緩楫未須行

旅宿

亂山行未盡落照一溪斜畏客前峰虎投人暝樹鴉已
知魚罷市數問酒誰家計日新安路應餐白岳霞

山中偶作

秋草長於人小鳥時出入但聞樵者歌不見行人跡

夜泛西湖

放櫂西湖月滿衣
千山暈碧秋烟微
二更水鳥不知宿
還向望湖亭上飛

梅谿

雲似魚鱗壓市低
竹籬載筍出梅谿
逢人閒問崑山路
葛嶺西頭更向西

葛鵑作 二首

筍鞭橫出欲穿籬
松子纔生鼠不知
細雨一林山鬼語
白鷗浴起葛公池
鴉啣朱柿墜秋坡
竹筧疏泉帶碧莎
野菊滿頭山下女
也能學唱采茶歌

吳門道中

柳花片片拂船牕
雪點湖田鷺幾雙
數到明朝寒食夜
半篷殘照過吳江

初夏

楊柳陰濃曳碧烟
一溪不雨不晴天
水樓處處凭紅袖
吳下新來茉莉船

王 醇 二首

醇字先民揚州人
錢受之云先民深情孤詣秀句錯出

書事

狼烟夜照大安戍
曠騎夜縛將軍去
駿馬駝金曉贖歸
正陽門底捷書飛

題馬湘蘭畫蘭

冰綃宛是湘江曲
寒映秋芳數枝玉
能使湘靈愴別魂
瑤瑟泠泠怨秋綠

何允泓 四首

允泓字孝穆嘗熟縣學生

詩話孝穆詩頗
嶽峯不沿時習

讀岳忠武傳 二首

傅張不得終經制

傅亮張所

韓岳何勞更枕戈
載主空傳之建

業

建炎間時幸平江建
康亦載木主以行

行宮漸侈似宣和
班朝清海成三恪

每金

朝會以天水郡侯遼
天祚劉豫為一行

振旅朱仙泣兩河
惆悵一生匡國計
止餘

遺草泣孫珂

戰血橫吞直指燕
秦垣心腹祲方纏
將軍河上空爭地

丞相閨中善格天

檜誅公用王夫人策
天閣高宗書以賜檜

蚤有雕兒貪厚餌

軍中

呼王貴
為雕兒

尚期龍府醉諸賢
張秦總是明經客
何但書生拜

馬前

讀元遺山集

滄海橫流著此身
中原天日照纍臣
明昌大定三生夢
欽叔希顏一代人
野史亭中遺汗簡
讀書山下起埃塵
幽蘭灰燼今何在
千載空餘老角巾

讀張光弼集

畫省無心久握蘭
西湖花月一叢殘
共傳軍府題詩客
肯作吳藩入幕宮
楊柳花時頻縱酒
牡丹開後獨凭闌

最閒園裏徵歌處江左三人管幼安

薛岡 三首

岡字千仞鄞人有天爵堂集

黃心甫云千仞篇中多用恒言讀之不厭由其氣老

李杲堂云千仞年八十集其平生元旦除夕詩為一卷起萬曆庚辰至崇禎庚辰身為太平詞客六十年名重天下亦盛事也

彭城寇 二首

幸作六帝民賢聖歷在宥身老桑柘間不知有格鬪戈
戟何忽焉一朝易俎豆郡盜既蠡起朝廷重介冑欲以
殺止殺血流污宇宙借問宇宙中何民弗從寇民志如
奔湍撫我斯共后乃信吏政苛不在猛虎後堂上鮮蒲
鞭溝邊餘老幼何況臨刀俎提兵肯相救

鬚齡苦行役况丁金革中艱難費輪楫弔古躋雲龍賊

至自淮南所過州里空頓兵桃山下意在窺二東洪河
不得濟賊計良已窮一旅儻躡後殲殪微遺蹤乃計不
此出妖蛟縱故宮清夜坐岑樓浩浩聞北風南山助烈
火天地為之紅國家養貌貅恃以戢狂鋒狂鋒不能戢
其誰怨乃躬無庸姦宄患所患求英雄道路有萬目看
敘賊退功

華清宮

繡嶺出烟邨宸游跡尚存離宮何處是流水至今温輦
路年深廢峰巒幸後尊空餘一片月猶似照朱門

顧同應 一首

同應字仲從崑山人庶子紹芳之子承蔭入國

子監有葯房秋嘯二集

王平仲云仲從詩辭澹意遠有白雲自出山泉泠然之致

秋塞曲

寒星散落角聲哀紫塞秋高鴈字迴昨夜軍前占殺氣
羽書飛過赫連臺

唐汝詢 二首

汝詢字仲言松江華亭人有編蓬集

詩話詩人形累者孫伯融跛偶武孟張節之謝茂秦眇視希哲杖指何仲默秃筭其他不可悉數至唐仲言無目李公起口啞耳聾兩君乃能勤於箋述不廢吟咏是難能也

夜別陸長倩

悵別高樓酒易醒坐聞落葉滿沙汀春來儻憶同游地
無限垂楊夢裏青

留別沈茂之

風雅翩翩自不羣榮華入目總浮雲江湖此去無知己
蚤晚移家欲就君

李 竣 一首

竣字公起鄞人有盟鷗集

詩話公起御史尚默之子生而耳聾十齡聞父訃號哭五晝夜遂瘖嘗發先世遺書縱觀之上自國家典故名公鉅卿前言往行下及器物之微靡不諳其本末候官曹能始合華亭唐仲言作二異人傳一以耳治一以目治咸不惑於公安景陵之說世之號為詩家者反不如瘖聾之指麾矣

山陰晚泊

落日山陰道孤舟帶遠汀秋林紅葉重夕浦黑風腥客
夢碁前斷漁歌鏡裏聽來朝餘興在何處訪蘭亭

明詩綜卷六十五

明詩綜卷六十六

小長蘆 朱彝尊 錄

琴川 邵士楨 緝評

文震孟 二首

震孟字文起長洲人天啓壬戌賜進士第一授翰林修撰以言事鐫級崇禎初復原官歷中允諭德掌司經局右春坊進少詹事以禮部左侍郎兼東閣大學士卒謚文肅有葑圃詩藁

陳皇士云文公

詩不多作然不失臺閣氣象

靜志居詩話文氏自溫州守以來累葉風流儒雅為士林所推相國晚達早歸崇禎五十輔臣骨鯁稱首烏衣子姓名節相繼不媿清門是難能也詩頗平纏擬古一章纏綿婉約庶幾屈宋唐景之遺音乎

擬古遠行

江之陽兮有嶼江之陰兮有渚朝而風兮夕而雨望夫
君子渺何許春波兮悠悠日暮兮夸猶擊青桂兮為檝
搴木蘭子為舟况含思兮凝睇乘清風兮遠游遠游兮
上下載行兮載舍遵中流兮待君將寄心於遠者

夏日園林

境乃同搖落人猶是勝流即今便高卧未擬賦窮愁家
傍要離冢門迎范蠡舟孤蹤安可定浩蕩五湖遊

陳仁錫 一首

仁錫字明卿長洲人天啓壬戌賜進士第三授
編修累遷南國子祭酒追謚文莊有無夢園集

詩話吳中甲第之盛前數嘉靖壬戌申文定王文肅同郡人後則天啓
壬戌文肅陳文莊同縣人兩公皆老於公車晚始登第而文莊為先
文恪萬曆丁酉所拔士至壬戌復為先公所錄及殿試則先公又充讀
卷官蓋三試皆出先公之門亦異事矣文莊以不肯撰魏璫鐵券文落
職可謂不負科名詩非所務
一嚮染指未為不知味也

中秋

月華冷于霜水白已成路宿鳥靜不鳴羽毛紛可數

蔣德璟 一首

德璟字若柳晉江人天啓壬戌進士改庶吉士
授編修歷侍講諭德庶子掌司經局累官太子
少保禮部尚書文淵閣大學士有敬日草

詩話八公敏於掌故典禮治曆條奏詳明使其黼黻太平
亦稱賢相惜乎未究其才或傳公吞金而死尚俟考實

至廣州聞黎捷志喜

重開幕府試瑠戈七哨功成獻凱歌借問凌烟誰第一
漢家劔履賜蕭何

方逢年

二首

逢年字書田遂安人天啓壬戌進士改庶吉士
除編修累官禮部尚書東閣大學士有雪滌齋
集

越來溪

層臺築五年高見三百里如何越兵來不知渡溪水

乳洞口水碓

陟阿采玉芝浮澗拾瑤草野碓竟日春誰識是龍腦

馮元颺

一首

元颺字爾菽慈溪人天啓壬戌進士知澄海揭
陽二縣入爲戶科給事中歷官兵部尚書

首善書院感舊作

維貞皇帝神授符詔出明光徵大儒有臣元標首應詔
誰竝進者臣從吾一時諸儒相繼入王道蕩蕩民所趨
貞皇雖逝嗣皇少譬之日出時未晡諸儒謂可睹上治
力崇正學開榛蕪請爲天子建書院揭以首善天之衢
漢唐宋代何足數升堂入室泗與洙當使亂臣賊子懼
如陸有軌水有桴豈無屬鼎相錯列能由是路亦吾徒
越歲壬戌策進士臣颺蒙與諸臣俱二十爲學志方壯
晨起盥漱遵修塗少焉諸儒次第入鳴鐘擊鼓聲鏗于

衣冠肅對寂未語森若披古賢聖圖儒者寧盡闕世務
憂天往往多訐謨乃知名教自足樂照耀萬古焉可誣
彼譖人者亦太甚曰宋之敗由程朱封疆在今多事日
衰衣博帶何其迂輔臣向高為此懼手自伏疏陳青蒲
誰為此言告陛下當付之吏法當誅天子寬仁置勿問
忍見白日舞妖狐嗚呼諸儒死不恨宣尼粟主誠何辜
乙丙之際不可說故老欲哭徒嗟吁丁卯八月聖人出
讒者慄慄憂頭顱臣臆再入問書院門外細草翔啼鳥
聖人豈不重經術時危未暇陳蒼瑚竊見京師富梵室
口語以唄拜以膜亦有高閣祀天主譚兵治曆喧齟壺
獨使書院屏勿事臣臆敢復惜微軀卿雲縵縵天子都

諸儒靈爽應未徂大道經天終有孚幸甚為念臣區區

孫可伯云京師首善之地琳宮梵宇嗚吻相望獨無學者敬業樂羣之地往時羅
人恭徐文貞講學率借僧舍誠大闢事也天啓二年御史臺諸公備書院一所於
宣武門內東牆下南皋少墟兩先生朝退公餘不通賓客不赴宴會輒入書院講
學一時士風為之少變未幾逆璫用事郭允厚朱童蒙輩相繼論劾以講學為門
戶及楊忠烈劾魏忠賢疏上黨禍大作善類一空而御史倪文煥遂奏請毀書院
棄先師木主于路左左壁有記為葉公向高文董公其昌書竝碎焉書院既毀逆
祠乃建矣

詩話萬曆二十九年二月庚午朔天津河御用監少監馬堂進大西洋
利瑪竇所貢土物時先太傅文恪公掌禮部尚書事疏言會典止有西
洋瑣里國而無大西洋其真偽不可知又寄住二十年方行進貢與遠
方慕義獻琛者不同且所貢天主天主母圖既屬不經而行李中有神
仙骨夫既稱神仙自能神舉安得遺骨此韓愈所云凶穢之餘不宜令
入宮禁者也乞速勒歸國勿許潛居兩京與內監交往以致別生支節
眩惑愚民疏進不報後其徒湯若望以其國中曆法證大統之差徐宮
保光啓篤篤信之會大時雍坊所建首善書院鄒忠介馮恭定講學之所
董其役者周忠毅宗建呂工部克孝時先大父楚雄知府以任子除都
察院照磨竹頭木屑實司其勞書院成葉文忠撰記董文敏書之先大
父業選官故未書名于石也兩公講學事在天啓二年既而御史倪文
煥等詆為偽學疏略曰聚不三不四之人說不痛不癢之話作不深不

明言錄卷之六
四
淺之損噉不冷不熱之餅是年碎其碑暴之門外毀先聖粟主焚經籍於堂中崇禎初文煥伏法院僅存宮保率若望等借院修曆署曰曆局久之西洋人踞其中更為天主堂至今不改矣馮公是詩毋忝詩史

倪嘉善 一首

嘉善字迪之桐城人天啓壬戌進士改庶吉士授簡討遷司業歷中允諭德有婿筆泉集

詩話崇禎己巳帝幸太學賜倪公坐講周易泰卦又嘗侍經筵講論語益者三友帝問孰為益孰為損對曰天子尚友在法堯舜而已帝為改容公太僕卿贈工部侍郎應春之子太僕天啓中請留楊左尋削藉者也

九日

牢落家居久頻逢令節過秋聲聞鴈少霜意入林多幽思驚時換山游奈雨何韋生高卧穩黃菊許誰歌

張有譽 一首

有譽字誰譽江陰人中萬曆己未會試天啓壬戌賜進士出身除南京戶部主事累官戶部尚書加太子太保晚為僧居蘇州之靈巖

俞無殊移居光福山同顧茂倫樵水訪之不值留

贈

一逕逶迤入升階眼膜開當牕羅洞壑平地儼樓臺山翠侵簷落花香拂案來扁舟同訪戴興盡尚徘徊

倪嘉慶 二首

嘉慶字篤之江寧人天啓壬戌進士除戶部主事歷戶科給事中晚為僧名函潛又更名大然有靈潭集

詩話倪公治賦之才崇禎戊辰在樞部上言國計入不敷出歲額缺至二百三十餘萬何以支持其言瞭若指掌假令思陵此時聽公之言綢繆區畫則後此雖有水旱寇賊尚可緩於危亡而惜乎不見納也既而兵科給事中劉徽疏請裁驛遞有旨裁十之三省郵傳銀六十萬公獨昌言曰驛遞之設貧民不能自食者賴之裁之太過將鋌而走險此盜生之源也俄而李自成果以驛卒被裁走入高迎祥隊中後遂以亡明朝野咸服公計慮之遠云

獄中九日寄受之

禁柝方嚴晝掩扉登高作賦苦相違更無叢菊開籬落
只有飛霜上客衣九月吟蟲猶野泣五年征鴈失南歸
山頭廷尉遙相望緊繫黃囊送夕暉

驟雨

雨驟泉聲急雲涼樹色濃不知何處寺忽送一聲鐘

王錫衮 二首

錫衮字龍藻雲南右衛人天啓壬戌進士改庶
吉士授簡討歷侍講南國子司業諭德庶子祭
酒以吏部左侍郎兼翰林學士

聖駕臨雍恭紀 二首

乍挹方諸水來湘泮水芹金樞澹華月玉露展蕭辰俎
豆三千士都俞十九人公庭看萬舞未許羽衣陳
樸學皋謨古昌言聖主聆硬黃摹獵碣淡墨捧名經胄
子齊歡洽真儒足典型自今隆祀典長照簡編青

詩話崇禎十四年八月太學當釋奠思陵有詔再臨辟雍於是罷遣閣
臣及分獻官時龍虎山真人張應京適在都疏請入監觀禮尚書蔣公
德澤暨王公咸持不可駁回十七日王公奉遣祭夕月壇二鼓始詣國
子監十八日卯初刻駕自長安左門出由崇文街至成賢街入廟門兩
公導帝升階坐御帳內官持金餅金甌金鑪者六人天漸明行釋奠禮
畢幸彝倫堂祭酒南居仁講書皋陶謨自天敘有典至敬哉有土司業

羅大任講易咸卦尋命賜茶文班自衍聖公及閣部共一十九人武班三十八人分東西坐帝命禮臣將進士題名碑并石鼓悉摹拓進呈又諭閣臣周程張邵朱六子不當驟置先儒之列乃定議改稱先賢云是舉也蔣公紀之特詳今節錄以證王公之作

文安之 一首

安之字汝止夷陵人天啓壬戌進士改庶吉士

授簡討遷南國子司業歷中允諭德詹事有鐵

菴臺

山居漫興

一江烟雨理漁蓑筍笠長拋首自科薄醉久無中使促
夜歸須憚灞陵訶雲連西塞迴青嶂樹繞東流旋綠渦
為傷赤磯依舊隱月明堅坐扣舷歌

齊心孝 一首

心孝字君求桐城人天啓壬戌進士改庶吉士

授編修

詩話太史賦詩無多與女郎沙蘭英章文玉定情一物相貽拳拳叩叩宜其為情死也

答女郎沙蘭英貽鴛鴦枕

含情少婦倚銀缸繡罷鴛鴦日滿牕解得世間離別苦
故將好鳥織成雙

姚孫槩 三首

孫槩字心甫桐城人天啓壬戌進士知龍游晉

江二縣擢江西道御史謫上林典簿遷吏部主

事歷郎中累遷至尚寶卿有石嶺集

久雨新霽喜殷氏兄弟邀飲

閉門十日陰門外喧履齒已聞前谿漲更見屬垣圯曜
靈胡匿輝風雨橫如駛暮霞照東隅魚尾差可擬凌晨
下檐楹邂逅逢之子相邀卧甕頭一斗飲未已醉翁意
有在歌者聲且止

車中漫紀 二首

茅店孤燈黯繩牀旅夢安不知一夜雪但覺五更寒際
曉山山白因風樹樹殘憂時誰紀瑞默坐卷簾看
初日照高樹前山霧始開怒飈一以發寒氣轉相催野
色遙難即羈愁莽欲來故人居不遠去去好銜杯

喬可聘 一首

可聘字君徵一字聖任寶應人天啓壬戌進士

除中書舍人選授河南道御史有醉陶集

詩話崇禎丁丑侍御巡按浙江既入境屬吏伏謁道左公首詢先太傅
第宅吏以鍾秀坊對旌蓋闢于藉袈之橋公自巷左舍車徒行百步入
自門升階肅衣冠拜祠下復坦步出巷之右乃升車鼓吹導以行余總
角時目擊其事又六年武陵唐公紹堯分守嘉湖道入境亦展謁先公
祠則將及門而步入然禮容甚恭於時弟子敬
其先師若是由今觀之正可綴入觚不觚錄也

苦雨

雨喜及時好雲陰竟不開馬牛幾莫辨鷗鷺盡飛來茅
濕痕多漏沙崩響易哀田園生意盡排悶強持杯

黃宗昌 一首

宗昌字長倩即墨人天啓壬戌進士知雄縣調
清苑選授山西道御史

詩話三殿告成論功行賞長倩時官御史上言國家名器盡為闡寺收
買腹心之助大行賓天在八月二十二日而殿工行賞在二十一日正

彌留大漸之時何暇出詔此輩直偽官爾詔令指名長倩乃舉黃克纘
霍維華呂純如等六十六人以對請盡行削除是亦勇於觸邪者已唐
諺五角六張作事不成
七夕結句蓋用此語

七夕有懷

危坐撫佳節蕭蕭但雨聲閨中兒女態天上別離情秋
入玄蟬急年侵白髮生所嗟垂老意張角總無成

吳振纓 一首

振纓字長組歸安人天啓壬戌進士除中書舍
人考授廣東道御史有顛石齋詩集

棲賢看梅

萬樹惟一色半山堆白雲烏啼邨不夜香遠客先聞近
寺松陰合橫枝澗影分誰家修竹裏簾外亦紛紛

詩話詠物詩最難工而梅尤不易林君復雪後園林纔半樹水邊籬落
忽橫枝此為絕唱矣他如疎影橫斜水清淺暗香浮動月黃昏僅易江
為二字以竹桂為疎暗是妙於點染者餘則蘇子瞻竹外一枝斜更好
高季迪薄暝山家松樹下亦見映帶之工高續古絕句云舍南舍北雪
猶存山外斜陽不到門一夜冷香清入夢野梅千樹月明邨可謂傳神
寫手朱希真詞橫枝清瘦只如無但空裏疎花數點李易安詞要來小
酌便來休未必明朝風不起皆得此花之神若朱雍之梅詞黃晞顏之
梅苑李龔之梅花衲釋明本之梅花百詠詩愈多而神愈遠矣侍御棲
賢之作實
僕我心

何萬化 一首

萬化字宗元青浦人天啓壬戌進士授南京兵
部主事歷禮部郎中升福建提學副使轉右參
政終廣東按察使

詩話宗元仕闈為制府畫策平劉香入楚同諸軍協
力擒張普薇是亦開濟之才不徒以雕篆見長者

贈別

彩鷁銀燈此夜親相看莫惜酒杯頻明朝茅店風霜苦
縱有盈觴不醉人

金肇元 一首

肇元字木公一字司杓東陽人天啓壬戌進士
除徽州推官入爲工部主事調兵部轉員外出
爲江西參議進副使遷福建參政

雨過鳳陽望祖陵

濠右鍾靈地關河迴未窮江迴雙闕北淮繞二陵東古
驛荆榛雨高原燕麥風遙瞻松柏路佳氣鬱青蔥

蕭士瑋 五首

士瑋字伯玉泰和人中萬曆丙辰會試天啓壬

戌賜同進士出身除行人歷吏部郎中有春浮

園集

錢受之云伯玉詩體氣清拔取法涪州今體偶然與
放翁合 趙韞退云先生詩以才慧勝出入宋元

客愁

不待秋風起思鄉念已生髮愁今夜白月好故園明孤
客人千里荒城鼓二更停燈沽濁酒屈指數遊程

春日送繆當時被謫南歸

正好留連日翻爲惜別人憐君愁對酒作客怕逢春芳
草迷歸櫂啼鶯傍逐臣東風如有意莫遣柳條新

滁陽晚行

禾黍斜陽道秋風匹馬行古原荒霧白野水暮雲平酒
逐年偏減情因老更生不知今夜月何似故鄉明

寓意

誅茅宜楚地無如廬阜美五步一溪雲十步一溪水

月夜西泠橋

霧鬢烟鬟逐處嬌輕風著面酒初消月明故國三千里
人在西泠第一橋

黃景昉 三首

景昉字太穉晉江人天啓乙丑進士改庶吉士
授編修歷中允諭德庶子升少詹事以詹事掌
翰林院尋以禮部尚書入直東閣加太子少保
戶部尚書進文淵閣大學士

詩話相君務去陳言專尚新警其近體尤雕繪如侍楚王宴云隆準衣冠高帝後影頤官闕大江滄谷太和絕頂云天野星躔包兩戒國朝嶽瀆視三公南臺燕集云仙家閭苑琉璃浦禹貢揚州篠簜田贈友云少從魯國稱男子家近茅山得異人壽樊叟云公餘穉子燒松液酒半材官舞蔗竿集北郭草堂云誰邀玉珮神仙客自唱清歌苦薩蠻荅友云枚叔賦游梁上苑伏生書重漢西京寄友云以吾一日長乎爾如此三星架者何要

未央瓦

客來移甍漢時宮丞相經營想像中武庫不隨蛇劔火
鄴城空貴雀臺銅猶餘龍虎真人氣未蝕蟲蠹累代功
敢向玉池輕點染更無雄句似歌風

何太常悌邀步南郊觀園丘享殿齋宮諸制恭述
皇矣穹窿廣君哉制作殊改絃散世廟分祀別留都日
練金支秀春回華蓋趨竹宮靈放惠羽客韻虛無繭粟
三犧用爪華百末敷篆烟颺鬱鬯影入珊瑚富媪壇

仍峻高皇座稍隅殿詢公玉帶庭接鬼吏區憶昔陪清
蹕于茲饗大雩烏銜齋饌素沙點布袍烏重許窺閭闔
須知辨濮瀘帝真雲漢主天轉斗牛樞禁地人雍肅祠
官汝敏膚秩從夷典禮倫始契司徒誰獻河東賦空吹
冀北竽戚干容肆雅卿景合賡虞

書事

內家驟括馬驟車火綫葦簾製也疎誰遣園扉中夜啓
銀鐺又及老尚書

宋

致一首

致字文玉萊陽人天啓乙丑進士知永城杞一
縣事選授吏科給事中歷太常少卿大理太僕
卿轉工部右侍郎家居萊州城破被縛拷掠見

殺

閨思

征人磧裏正思鄉八月看雲送鴈行生小不知門外路
如何飛夢到沙場

陸錫明

一首

錫明字幼輿平湖人天啓乙丑進士除工部主
事歷員外郎出知常州府再知徽州府升江西
提學副使

白岳太素宮

天遣名山護紫虛芝泥曾到使臣車石幢隱見宮中線

碧瓦參差帝者居封禪有書非漢時
椰梅何地不秦餘
未須泛海尋靈藥水落花開自起予

郭紹儀

二首

紹儀字汾仲平湖人天啓乙丑進士除當塗知
縣擢南京湖廣道御史有青蒲草

游仙詩

少室垂三花盈盈秀菌閣我驅一卷石偃蹇卧溪壑輕
陰斂素秋虛篁散紫籜自得枕中祕始知塵外樂容成
采玉芝抱朴煉五藥矯首鴻天長此志欣有託

同官李匡山成寶慈俱以疏劾輔臣被謫感而有
作

花莫眴武陵花酒莫飲烏程酒武陵花豔迷人目烏程
酒甘誘人口李公骨鯁天下奇壯志屹立山勿移此時
朝廷重鈞黨阜囊霜簡無遲疑成公凜凜氣雄發夜漏
沉沉整袍笏漳江學士孤鳳鳴慘澹萇弘碧流血成公
裂眚那肯平苦諫危辭三伏闕二公名義垂不朽二公
既去儒林醜武陵花烏程酒花殘酒歇終何有君不見
柳外東風動江樹輕薄紛紛飛作絮莫遣烏啼白下門
子亦飄然拂衣去

李

模

三首

模字子木太倉州人天啓乙丑進士除東莞知
縣選授雲南道御史以憂歸補浙江道謫南國

子典籍有碧幢集

王無異云先生同不失已異不傷物合乎易所云知進退存亡而不失其正者

鬼車謠

鳳皇將九子雖鳴何秋秋羽蟲三百六賦性多令攸奈何有怪鳥一身伏九頭誰者齧其一灑血聲啁啾晦冥乃潛出四野風不休人號犬亦吠滅燭收兒樞同心如禦寇懼其少淹留非徒被不祥恨非陽鳥儔遺音雖遠已戾氣猶噓咻是關玄黃戰豈惟風雨憂吾聞多見可此類安足仇豺狐竝晝嘯前鷄後鵠鶩勞勞服不氏枉矢焉能讎誓將叩閭闔桃茱殉九州

寒夜有懷

浩浩夜氣長霜風凜寒衾思來乍如髮繚繞不可尋清夢倏飛越山海何崇深孤月懸青松鶴子多奇音戶牖洞開豁中有綠綺琴

南思

畦丁忽報韭牙春對對河鮑入饌新笑指蘆根堪續命不須子細祝廚人

陸澄原

一首

澄原字嗣端平湖人天啓乙丑進士除工部主事歷員外郎謫順天府照磨遷大理寺副以兵部員外被察閑住有芝房集

詩語思陵初政職方首攻魏崔海內想其風采無難躋膺仕而乃厭薄門戶不屑附東林其封事略云有市恩修怨舉劾失平者雖東林亦可謂之小人不得以楊方為護身之符有特立獨行恪共厥職者雖非東林不失為君子不得以崔魏為陷人之棄又云臣寧寡援孤立為經

經之小人決不依草附木為疑似之君子由是見嫉於東林拒之惟恐不力一官蹭蹬被察而歸放浪山水以詩酒自娛斯狂狷之流也詩亦不入鍾譚流派

溪外

短橋隱隱隔清溪溪外人家更向西行盡西溪人不見
一林脩竹画眉啼

葉紹袁 一首

紹袁字仲韶吳江人天啓乙丑進士除武學教
授轉國子助教遷工部主事有遷聊集

甲申閏三月十九日之變

衡門薜荔久侵尋自媿才非抱膝吟逝水總流千古恨
夕陽空負百年心蒼生四海同仇切白髮三春憶主深

七日誰人牆下哭一回北望一沾襟

熊開元 二首

開元字玄年號魚山嘉魚人天啓乙丑進士除
崇明知縣調吳江選授吏科給事中謫山西按
察司簡較遷行人司副以言事廷杖削籍遣戍
晚為僧名正志字檠菴居蘇州之華山有華山

紀勝集

詩話魚山欲劾宜興適思陵許奏事者於弘政門名對及入見宜興侍
側因言軍事而出既而召見德政殿輔臣亦入乃言曰易傳有云君不
密則失臣臣不密則失身臣所言願輔臣暫退思陵諭曰輔臣管密勿
熊開元前所奏卿等皆與聞可以不退是日不敢盡言思陵命草疏入
仍有茶果餅餌之賜迨疏入遂被收思陵怒且不測矣會姜公如農疏
有皇上何所見而云然乎等語怒益甚兩公受杖之苦用刑之慘其不
死者幸也爰書既上思陵一曰讒譖輔弼再曰讒譖陰狡三曰謫毀狡
肆人皆疑思陵曲護宜興獨尹樞部宣子謂思陵時已恚宜興命魚山

具疏者度必列款欲據之便按問及見疏乃曰如此不痛不癢思兩邊
做好人邪蓋實怒其不力參而反以誹謗大臣為罪非思陵本意也斯
言得之宣子諱民興亦嘉魚人有菴園
集詩務詭異多牛鬼蛇神語不足存

鳥道卧獅石

從來入蜀歎崎嶇九折何如此路迂若是香林黑獅子
向前翻擲肯踟躕

穿雲棧

盡日凝雲谷口封倦還飛鳥亦迷蹤何如近借齊廚鉢
鞭取耕烟白耳龍

詩話華山在吳西偏相傳支道林銷夏之所劉宋時會稽守張裕舍宅
為寺縣志稱南渡乾道中秘書監張廷傑占為別墅然范致能有華山
寺詩云五湖西岸孤絕處梅檀大士來同住蒙泉新潔鑑泉明淪茗蓋
藜甘似乳何須苦問蓮開未桂子萱花了今古三翁彩筆照青霞從此
他山都不數我今間行作開容暫借雲牕解包具魂清骨冷不成眠徹
曉伽跌聽粥鼓乾道中寺未嘗廢張氏別墅乃占斷開田爾魚山紀勝

詩序中仍沿縣志附疏於此。

朱治憫

三首

治憫字子暇嘉興人天啓辛酉舉人選授肇慶

通判

詩話子暇宣勞戎務一星卒殞天南生為進表之劉琨死作思歸之温
序其詩不沿時習磊落欽奇至賣宅一律悽惻纏綿菴菴之草心實傷
已

麥章間贈硯

麥君遺我硯采自羚羊峽鸚之鵠之眼審視碧光眨白
如蕉葉萌黑比魚雲壓中有青青花瑣細不可掐山川
蘊精氣匠石變遺法雀斑幾點露鮞血兩邊夾外規直
且平中池淺而狹注茲水一泓三宿尚容畝我來吏端

州判牘日鈎押勞人何草草有時服靺鞨頻年硯欲焚
是物不我甲朝來三摩挲貯以琉璃匣他日抽簪回蓬
牕恣賞狎作詩崇禎年月涂歲協洽

胡將軍一青臨陣歌

將軍用槍如擲梭上馬殺賊功最多馬頭一卒鷲鳥過
往來拔刃誰敢何果下之馬山頭坡有時奪取紫索駝
將軍神勇孰同科除是漢代雙伏波我書露布盾臯磨
比田僧超壯士歌

得家報知敝廬已賣歎之

拮据經吾手書來已屬人一身猶長物四壁委微塵歌
哭今無地琴尊別有鄰庭梅應為我望絕嶺南春

楊文驄

六首

文驄字龍友貴陽人天啓辛酉舉人崇禎中知

永嘉縣事歷官都御史有洵美堂集

那孟貞云洵美堂詩紆徐以尊

遠駕摯以達情引物連類廣博曼衍屢出靡涯而源流師法燦然可指史弱翁云龍友詩沉澹淵遠有正始之音

游太湖龍背

晚色澹將夕探奇出林藪大龍與小龍礪齒震澤口鱗
而鬚鬣張哈呀悉諸有落潮洗塗泥寒玉森戶牖淘沙
尋金書人各繫在肘吾欲窮其幽慮為鬼所守肅然袍
笏侍下拜不敢苟豈知層雲根乃勝洞天九

海上作

水驛將三宿茅茨近百家舉鉏刪濕葦迎月伴荒衙燈

下哀汀鴈潮頭漉浦鰕小民方疾走官稅莫紛拏

宿木瀆

竟日秋光冷維舟寄古邨隔橋依榜火晚市辯方言水
已通湖氣沙看露樹根館娃談往事歌舞夢中喧

答陳司理卧子

峻節山陰道魚書過婺州遠人驚異數高論許同舟僻
壤蘭為國荒城竹作樓自憐隨去住淮海亦曾留

苦雨

海國重陰合涼飈五月寒淋漓欹枕聽朝暮倚簾看問
路空懸屐尋山欲墊冠獨憐黃鳥語終日自緜蠻

夜過練瀆

松風謾謾澗粼粼金鎖曾輝画角新借問水犀三十萬
何如君子六千人

鄭龍采 四首

龍采字聖昭歸安人天啓辛酉舉人婺川知縣

有高密堂詩集

詩話聖昭雅尚清狂與烏程丁永鑑同舉於鄉酒分詩情最相親暱丁
有為山閣詩大都北里冶游之作聖昭牽絲入黔謁楚撫何公騰蛟公
欲留為監紀辭曰朝廷命某宰婺川不命參公軍事也及解組過楚何
已殉難既歸祝髮入下山不復與聞世事句如長江無六月驟雨不崇
朝明月幾時上歸雲未得聞花飛晴見雪竹密晝垂陰殘雪重重白歸
鴉陣陣圓暗泉濶草驚鳥落花寺隨人意改身列上方閒戍荒遲
夜柝人定話歸潮
非蹈襲者所及

小雨復止

小雨公然止車薪水一杯已經三伏盡更得幾時來鵲

尾搖晴樹螢光上濕苔終宵仍不寐傾耳聽殘雷

雪崖禪師向有法雲社約別後十年矣適晤在初
溟津二師於天聖講席出示社中諸作因題

不作陶元亮攢眉為酒杯十年千里外二妙一時來聽
法知三藏瞻雲識五臺何時入林去同看白蓮開

方水檻漫作

竹裏孤烟直溪流釣未歸豆花鋪地白絡緯應時啼半
謝荷重發新紅葉漸微避人宜最遠或恐叩柴扉

采松花

美人采松花紛紛落黃雪花落松枝輕當風更搖曳

張次仲 七首

次仲字元岵海寧人天啓辛酉舉人有待軒遺
集

詩話先生晚隱郊廬高臺上履二
之節詩有真意不盡規撫古人

月出

微涼今夕好月出正當門岸幘微風至鈎簾清露繁客
來宜卜夜吾醉孰留髡軟語勞紅袖頻催碧玉尊

天闕

東風吹大海日夜動孤城若木津難逮乘桴汎有程童
三千徐市士五百田橫料得逢同調援琴移我情

北固山

登臨來北固俯視大江濶鐵甕人烟起焦山水氣深浮

沉天設險來往客何心一塹分南北茫茫自古今

寄陸真如

草綠風翻戶河平水繞邨放船隨近遠隱几度涼温
盆貼新荷葉牕依老樹根悠然觀化理清興與誰論

屏跡蘇邨漫題屋壁

鹽官城北郭溪東草屋蕭蕭寒雨中瓜架豆棚新築圃
長竿短笠老漁翁提攜小豎敲茶臼勞苦山僧理藥籠
吾老自應耽伏枕人前那敢說冥鴻

詠史

匕首投銅柱金椎中副車吾謀適不遂天意復何如

台徑

苔徑路欹危幽人自來去但聞啼鳥聲不識鳥啼處

錢千秋一首

千秋字真長海鹽人天啓辛酉舉人有青崖集

過張王府基

落日張王府春風麥秀齊誰知沼吳士依舊越來溪

高皇

帝破吳師
由湖州至

錢嘉徵一首

嘉徵字孚于海鹽人天啓辛酉順天鄉試以國
子監生中副榜晚選授松溪知縣還自閩卒於
里有松龕剩橐

詩話孚于以秋試留國門首上書論魏忠賢十大罪自漢東京宋南渡
諸太學生後久無此風節矣或勸其勿上孚于慨言曰虎狼食人徒

手亦當搏之舉朝不言而草莽言之以為忠臣義士之倡
雖死何憾自是言者相繼而起元惡乃除信豪傑之士也

福州口號

杜牧三生憶舊游
珠簾遮住一層樓
此間真色無梳洗
蕙箭開時插滿頭

董守諭一首

守諭字次公
鄞縣人
天啓甲子舉人
有董次公

集

詩話次公於詩不屑寄
人籬下然與風雅尚遠

憶妻子柔

與君隔山川
邈然託素臆
靜言想德容
淵致若不測
宛然河汾生
論文篤悃幅
使我飢渴懷
如飽秋稼
穡斯文儻我期
願言求懿德

鉏用登一首

用登字百穀
秀水人
天啓甲子舉人

小園初成陳仲醇過

版築登登罷
圖書處處遷
茅柴過橋酒
燈火到門船
竹徙上番雨
荷開半兩錢
醉吟無不可
為我拂朋箋

沈弘度一首

弘度字公雅
桐鄉人
天啓甲子舉人
有五願齋
集容餘軒
橐畏吟小草

憶北園

頗憶衡門下
幽居有北園
覆檐新竹嫩
滿地刺梅繁
好

友時來過清琴每自援齊民有要術試驗老農言

池顯方 一首

顯方字直夫同安人天啓甲子舉人

西湖

暮靄朝烟色轉濃微茫不辨是何峰堤花半上春人鬢
湖水長留昨日容逐粒禽魚爭一隊同舟男女坐雙重
南朝歌舞沉荒草愁聽黃昏兩岸鐘

譚元春 二首

元春字友夏景陵人天啓丁卯舉鄉試第一有

譚子詩歸

錢受之云譚之才力薄於鍾其學殖尤淺謝劣彌甚以俚率為清真以僻澀為幽峭作似了不了之語以為意表之言不知求深而彌淺寫可解不解之景以為物外之象不知求新而轉陳無字不啻無句不謎無一篇章不破碎斷落一言之內意義連

反如隔燕吳數行之中詞旨蒙晦莫辨阡陌如生人戴假面如白晝作鬼語居然謂文外獨絕妙處不傳不自知其識之墮於魔也天喪斯文為孽於世承學之徒糊心昧目以從之不亦悲乎張文寺云伯敬入中郎之室而思別出奇以其道易天下多見其不知量也友夏別出蹊徑特為雕刻要其才情不奇故失之纖學問不厚故失之陋性靈不貴故失之鬼風雅不邁故失之鄙一言以蔽之總之不讀書之病也詩話鍾譚並起伯敬揚歷仕塗湖海之聲氣猶未廣藉友夏應和派乃盛行詩歸既出紙貴一時正如摩登伽女之淫咒聞者皆為所攝正聲微茫蚶蠅蠅鳴鏤肝鏤腎幾欲走入醋甕遁入蕩絲竟其意不讀一卷書便可臻於作者此先文恪斥為亡國之音也桐鄉錢麟翔仲遠友于友夏恒言詩歸本非鍾譚二子評選乃景陵諸生某假託為之鍾初見之怒將言於學使除其名既而家傳戶習遂不復言云

讀曲歌

交歡久貝齒有時落歡獨長在口

得蜀中故人書

蜀川兵定人靜老友天寒信來莫怪草堂深閉小橋邊
有門開

明詩綜卷六十六
吳有涯

一首

有涯字茂申吳江人天啓丁卯舉人崇禎中署
金壇教諭遷平陽知縣晚為僧隱鄧尉山

送張向之之京口

張子頭多白隆冬獨往還辭家一束被踏葉萬重山天
未兵方擾雲中詩自刪攜筇更何處笑別向昭關

張永禎

一首

永禎字仲燦順天人天啓丁卯舉人

薊州道中

匹馬漁陽道休嗟行路難霜林無定葉秋水有餘寒白
鴈飛初下明霞落未殘盤山凝望裏烟外出層巒

胡振芳

一首

振芳字來子秀水人天啓丁卯舉人選授漢陽
知縣

歸里後碧漪坊黃氏要主童子塾

自返牆東宅何曾竈突黔已無五斗米笑脫兩鞢襜旅
夢安蕉鹿浮名上竹鮎從今兔園冊一任老夫潛

明詩綜卷六十六

明詩綜卷六十七

小長蘆 朱彝尊 錄

魏塘 朱岸登 緝評

魏學洵 十六首

學洵字子敬嘉善人贈太常卿大中子鄉人私

謚孝烈先生有茆簷集

靜志居詩話魏忠節公被逮日天大雷電子敬徒跣攀號請隨行公語之曰覆巢豈有完卵父子並死無益也子敬乃微服緹騎後探起居抵國門邏卒四布乃變姓名匿都市營救不可得公既繫獄扶觀歸朝夕躡踊未嘗一入寢室淚盡脣焦家人捧水漿以進却之曰吾父詔獄中孰夜半而進之漿者病且革進以藥則又却之曰吾父詔獄中孰診視而進之藥者歷數旬而哀毀死矣思陵即阼朝士上聞于朝以是海內稱爲孝子大學士同里錢公士升序其集云子敬之志父存則不獨死父死則不獨生是誠孝子之知已矣當甲子秋忠節掌吏垣以激濁揚清爲已任天下仰望太平子敬獨私憂之歎曰無根之草其能久乎物不可以終通天殆蘊隆正人之毒而速之感也未暮而禍作人服其識

猛虎行

北山有猛虎不牝亦不牡哀哀無辜人吞噬十而九猛
虎且勿道蝨乃伏其尻壯士困顛躓蝨喙紛相撓為語
行路人且復忍此蝨撲蝨誤驚虎滅影苦無術虎頭置
短枕虎皮罩塵埃猛虎有死日蝨乎何有哉

長水怨

為友人
妾賦

妾家住長水長水東西流青青湖畔柳迢迢湖上樓十
三學釵書十四工篋篋十五臨牕繡精妙世無儔翩翩
少年子窈窕行相求借問樓上女可似羅敷不里嫗前
致辭願君且淹留美人好顏色終日樓上頭兼之臨牕
繡精妙世無儔君子謬垂盼聞言中心喜語我長者行

同聲謂應爾郎君美風度玉樹蒹葭倚十九渡長江聲
名若江水好花不獨榮天生合連理行行隨君去默默
思故里牽帷幾回喚低眉羞欲死臨鏡貼花鈿可憐體
無比紗牕春日午脈脈情何已憶我在家時拈香繡大
士金刀翦素綾瑩瑩白於紙刺成蓮花葉彷彿香風吹
香風吹入夢夢到蓮花池繡痕細難識但覺生蛾者靜
玩坐逾久忽忽心自疑似曾親見佛不知身是誰綾額
尚餘尺皚皚冰雪姿淡濡碧玉毫激郎為題詩郎書擬
右軍妾心亦委婉鍼鋒與筆意曲折隨郎轉繡罷持似
君秀色堪舒卷顧我每微笑妾顏先自靦落地為女子
可憐側室難陡然一回想心事慘不歡雖復蒙君憐鮫

綃恒不乾大婦貴家女妾身臧獲看上堂伺音聲下堂
候顏色含羞入空房惻惻潛相憶雖然潛相憶無用長
太息誠得君子懽不怨長離隔大婦奄逝世一家身獨
當漂蕩若浮萍隨君流四方南都復北都終歲長道旁
黃金散欲盡不思歸故鄉壯志在四海妾心暗悲傷君
怯不勝衣年來益憔悴十日九卧病奄奄滯旅次妾首
如飛蓬并日忘食事上無姑嫜親下無得力婢旋出又
旋入常恐呼不至憂勞填胸臆刺刺肝腸碎歲月漸消
耗妾身亦不支帶圍日趨緩空復存腰肢事君垂十載
不一生男兒羞佩宜男草悵然心中悲君嘗兩畜婢中
道旋棄之妾身非不容君自輕別離暮春三月盡束裝
謀南歸買舟僅如葉帷幕不得施長夜泊豐草巨蚊攢
氷肌生小長閨閣辛苦實難爲入秋弛行李僦人樓上
居小姑家海濱聞之亦來依雖非久居計氣息聊得舒
良人忽生心娶婦支門閨隨珠飾翠幃黃金飾綺疏紅
羅複斗帳寶馬七香車今日媒妁來東鄰有美姝明日
媒妁來西家有西施妾身匪木石焉得不孤悽對鏡影
如削安敢生言辭禮數任頡頏難比先孃時新人入門
來灼灼豔威儀二九頗不足二八頗有餘女伴覩鸞幃
嘖嘖相嗟咨君心愛幸絕迥與舊人殊非必顏色殊新
舊自相渝新人哭亦妍舊人笑不如孤房過慰藉眇矇
聊斯須情知心不存詞說空爾爲新昏浹旬日忽作南

都遊俗語莫空房挽衣不能留新人暫歸寧登車去由
由妾身姊為母同君亦登舟耳綰雙明月墮髻垂金塗
飄飄蕩湘裙色如安石榴輕盈作纖步翩若雲端游鄰
女相擁簇朱顏自生羞十年方得歸一喜還一愁顧君
色悽慘何用心恻恻莫非眷新昏懷此離索憂千喚不
一答默默自低頭舟行到長水妾自還家裏親戚往邀
君君固不肯起詰朝云解維舟中須盤桓勿用再往返
各使中心安恐君塗上寒幅巾裁合歡恐君塗上飢烘
栗盈朱盤木落霜露急勿使衣裳單千語囑奚兒勸君
幸加餐平明奚兒至顏色驟驚顫向前往叩問淚流先
被面郎君乞致辭此生勿相見十年恩愛深謝卿重依
戀奈卿久專妒會見中情變不如痛割絕免使腸輪轉
妾身得聞之狂頓摧心肝天乎我何辜天乎真無端雖
在夢魂中不料遭弃捐恨無晨風翼迅駛追君船淚珠
千萬斛那得飛君前牽衣一慟哭身死妾亦甘縱然被
驅遣曷不先一言一去永決絕何處鳴煩冤自從入君門
歷今垂十年雖彼雞與犬亦當念周旋如何鐵石人一
絕弗復憐惟胃胸血嘔委身赴清水骨肉痛如割龜勉
相救止姊恩父母深我生不如死尚冀南都還重來過
吾里性行吾熟知茲望殆已矣昔年別兩妾我淚揮不
止誰料行及身苦境苦如此嗚呼倉浪天茲恨何日已
新人入我門繡帷長日垂依稀覩容貌猶未通言詞臨

行詳睇視恰在登車時蚤知生死隔揮淚一致辭念與
小姑別淚落如連珠妾初進門來小姑九歲餘探懷索
果餽髮亂呼我梳今來已成婦骨肉情依依長別不一
語腸斷當何如我有兩丫鬟事我五六年大者髮覆額
小者亦比肩晨興聽呼喚夜深候我眠而今永隔別涕
泗紛潺湲平時解思我料爾當亦然掩淚入房來牕前
見鍼帖殘絲與剩綫寸寸皆儂血向日入君目從今長
斷絕委婉隨郎心郎心太曲折忽見大士像不覺淚洩
沓稽首乞慈悲妾身竟如何今生無罪過宿生愆怨多
安得轉君心春風被女蘿君心終不回不如赴長河稽
首乞慈悲再拜涕漣漣不望重聚首但願相見時雨落
不上天一見知何期婦人失夫心百念無可為但願新
人歡為君生男兒更念孱弱身疾苦不相離舊人識君
性新人安得知十年守窮賤心事多苦悲願君振高翻
及時凌風飛妾身長已矣相見知何期一字一嗚咽行
道皆酸悽

朱近修云源出孔雀東南飛作
而不盡規撫字句才氣無前

擬古 三首

游思隨飄風遠歷杜陵道道旁合歡花悉成斷腸草紅
顏不堪駐妾愁君亦老為樂逮良辰歸來何不早人生
數離別百年非壽考擾忙風塵中榮名詎為寶
所思不可見彈古相思曲曲中竟何言理短情自促野
卉非不香采之徒躑躅今日白頭吟昨日黃金屋

明言經卷之七
五
誰爲不死人懷此終日憂來日當大難今日且行游行
游須及時古語恒如茲口爾身不然留爲他人嗤今古
更相笑游者無還期

和陶 六首

偶步短檐下淡雲如遠山變幻斯須間玩之欲忘言柳
青菊花黃樂飢以長年優游苟能爾奚用百世傳
志士有奇懷何爲翳我情吾身如聚沫所寶非榮名但
問寓世間何以了一生秋風隕枯葉慄慄心自驚時哉
不我待淹留欲何成

夕陽在高柳黃葉依風飛我心匪傷秋不覺心獨悲慷
慨向前行動念多所依長道眇無吟究竟將安歸中夜
發長嘯一嘯百念衰但得此中樂百年願無違

鄰家有新竹日夕百鳥喧更有古梅花植我西北偏啓
牕與相向幽幽同空山朝看樵豎來暮看樵豎還似得
古人趣有意未敢言

忽忽有所思乃在天一隅豈敢憚修阻去去登前途
驪裹猶不疾揮鞭冀長驅向謂萬里長萬里更有餘一朝
悟馳逐轉盼歸其居

問余何所好所好在六經不作亦不述好古未有成笑
彼百家言戛戛何紛更屏去勿復覽閉門書黃庭滴露
小牕前好鳥向我鳴此際意無限默默緘我情

讀史 三首

魯仲連

鄙夫寧一身身外匪所計有如魏帝秦何與魯連事先
生獨個儻慷慨決大義白日走秦兵誠哉天下士

荆軻

蕭蕭易水波日晏客未至十三死灰兒勉強共大計坐
中擊筑人何不克秦使田光死也餞於期死也贄空死
一無酬烈士喪英氣願逐酒人游哭盡不平事

諸葛亮

受託誠不易知人良獨難南陽比子房誰爲鄧與韓將
相兼簿書心中多苦酸十出九空歸一身亦凋殘爲君
歌梁父中夜發長歎

九日同嚴知章澹如兄弟遊茶磨山

我來松陵尋好友到門恰值九月九主人大笑攜上船
船頭載花腹載酒舟子勸上姑蘇臺衆客首肯我獨否
青山宜作生面觀耳目熟爛妍亦醜但問誰家富修竹
我船便纜堤上柳布帆直指吳山陸起覽奇蹟竟何有
洞庭縹緲波雲沉彷彿頑沙卧千畝細雨斜侵濕布袍
放船倒出蓮花淒上方樹杪插浮圖石湖湖光照戶牖
隔林前度茶磨山共約聽歌到申酉驟觀山石勢頗仄
愁無平壤安杯斝斯須簫管咽流雲画船別駐清溪口
蘆花楓葉舞涼風豈必美人垂素手同來伴侶大叫絕
私喜茲權良不苟寒蒲縛蟹一十輩烏巾注酒七八斗

酒酣不厭觴令酷衆人或辭我輒受推牕更問曠與晴
皎月若出當坐守

茅簷雜詩

只在塵寰內居然徑獨迂此君疎類我石丈老於儒候
雨迎鳩婦栽花薙鼠姑客來深自慰知有濁醪無

王屋九首

屋字孝峙初名晚字蘭九嘉善人有學可齋詩

箋

魏禹平云山人詩蒼茫磊落不作喁喁細響

詩話孝峙以詩受知魏忠節因與忠節一門羣從和酬詩類劉改之詞學辛幼安嘗過同里曹學士齋學士曰先生尚能著屐遠步邪應曰有太史公不可無牛馬走鄉里傳爲新語

秋風辭

秋風秋風汝何殺我芙蓉摧我梧桐梧桐折予芙蓉死
鳳鳥安棲予鷓鴣安宮鷓鴣逝予文章隱鳳鳥不至了
吾道窮夫誰使我至此極孰非爾朝夕之秋風

子夜歌三首

千金買良玉百金求良工爲儂作雙環相連無始終
妾身妾自惜君心君自知莫將日後情不如初見時
家有千黃金不如得郎心家有千倉穀不如抱郎宿

陌上桑

可憐陌上桑朝看沃若暮萎黃餵蠶不了餵牛羊

春日過聞溪贈別許清機

我適後君來君復先我去人生如飄蓬能得幾回聚君

今別我歸何處直到錢塘江口住江水江雲日日流相思時倚江頭樹

辛酉端陽日

午節今朝是開尊名酒徒趁晴刪艾葉冒雨翦菖蒲重碧杯中滿輕黃額上塗醉憐雙鬢短還插健人符

送黃海歸新安

清秋客子歎歸歟載酒題詩一送渠細雨亂山遮汝人淒風落葉對誰居江村處處休黃犢野店家家賣白魚見說雅懷多不減每逢佳勝輒停車

題黃大癡橫幅山水

絕壁長松倒影低寺門殘日響迴溪老身意想如曾到

八月虞山拂水西

陸寶

十五首

寶字敬身鄞縣人官內閣中書有霜鏡集

曹能始云中翰

詩道遙容與蟬蛻塵埃之外 王伯穀云敬身詩篇麗逸讀之惟恐其盡 屠田叔云敬身古詩敦厚得江謝門風近體深沉具高岑家法 詩話敬身近體好用語助辭不無狃於公安景陵之習然其才氣奔逸 勝葛震甫陳仲醇且十倍近李處士果堂輯甬上者舊詩凡四百三十 人三千餘首自謂搜隱獲奇而敬身曾與余太常君房 屠儀部緯真楊處士伯翼識面卜鄰者乃獨遺之何與

五雜俎

五雜俎綺千箱往復來輦金忙不得已獻大璫

怨歌行

天胡以不五風十雨而旱潦螟賊歲靡有寧人胡以不披襟吐哺而爪牙毒螫立意相傾世胡以不解繩錯象

而戈矛荆棘日尋戰爭怨歌行此怨何時平

相公來

相公來合軍驚千夫執殳除道郊迎相公下車命長揖
口雖不言心內泣伍符尺籍新有名鶴入雞羣從自及
昔時上直何壯哉呵聲百口迅如雷行者止立坐者起
沙堤如拭大車來一朝禍至棲叢棘不賜屬鏤猶主德
阜帽騎驢出國門東海東頭聊假息秋高汛撤問歸船
手挈行囊只半肩富貴如雲真大夢胡椒鍾乳在誰邊

春雨

吾廬不厭晴吾田不厭雨禾焦恒苦飢屋漏卒難補人
心安有極天意竟誰主敢以一人私而忘四郊苦雨亦
恤民間涇涇注環堵待旦問田家立苗青可數歡然荷
鍤歸兩稅登天府

大水

瀕湖盈百堵積潦失寧居舟反高于屋人誰免作魚撈
萍迷曲巷望柳認前除正及西成日憂深藿食餘

光宗皇帝挽歌 二首

辨色初勤政龍樓御蹕臨禹謨咨益稷殷祚促丁壬禁
雪沾衣白宮池染淚深他年青史上從諫識天心
喪車蘭殿出隧道柏城通七月期方至元年曆未終仙
遊無棄屣臣節有號弓嗣聖鴻猷在河山豈盡空

周斗文自易水歸縱談燕太子及荆高遺事慨然

賦此

每讀燕丹傳長悲易水遙聽君談往事風起復蕭蕭

庚午元日

官廚柏酒泛紅霞烽戍初停聚飲譁遙祝萬年天子壽
小臣九十日看花

行嘉善道中夜宿朱涇

春潮覆草半江青長水分塗客未經少理蠶絲多織布
百家烟火傷朱涇

齋居

二首

層層樓榭枕松關每到花時獨不閒酒榼茶罇人去後
牕前一幅米家山

浴蘭初罷振纖桂竹枕桃笙手自攜避熱不教人點燭
滿樓涼月照登梯

送人之秦川

水鳥低飛狎榜歌木蘭雙槳送凌波浣紗人在中流見
錯認前山作苧蘿

湖上

承恩坊裏綠楊烟翠幄朱樓大道邊誰似儂家湖口住
當門人上木蘭船

廣陵懷古

茱萸灣接古邗溝白塔河分上下流疏鑿當時有深意
徒勞關吏日持籌

趙宦光

一首

宦光字凡夫吳人有寒山雜著

詩話凡夫以篆書名略用草書體書之號曰草篆紺園琳觀精舍名園咸乞其書題扁所撰說文長箋一時紙貴然自解人觀之未有不齒冷也古之小學書數方名字或不正童子皆知之自周秦及漢無不識字之學生其後大小二篆生八分三真六草諸體雜出古法未盡亡者賴有許叔重說文一編自一至亥本之倉頡造譜以四聲說文亡矣顧野王玉篇其文多於叔重孫強又增益之迨題以大廣益而玉篇亦亡矣蓋書之最古者莫如篆學野王雜以隸書已失其舊李陽冰刊定說文頗出私意詆訶許氏學者已恨之凡夫草篆其又何所本乎世人一遵晦菴朱子之說以灑掃應對進退為小學書數方名槩置不講無怪乎小學放絕篆法日微可歎也已凡夫饒於財卜築城西寒山之麓洵沐泥沙仰山骨畢露高下泉流几游於吳者靡不造廬談讌廣為樂方特於韻語遜其鄉里

登華山

鳥道縈紆上深林幾折盤支公此銷夏五月晚猶寒

朱

鷺四首

鷺初名家棟字白民吳人有青浮子顓籟

詩話白民負奇嘗獨游黃山遠尋嵩華所至畫竹以自給家居撰建文書法擬思進呈請復革除紀年不果學殖初騎驢入都上所作甘露頌又不果歸結茅於郡西華山蓮子峰下躬親井臼不願見貴人年八十餘乃卒是時隱居者在公芥菴趙宦光凡夫時稱吳下三高而敦古節者白民為最文

自君之出矣

自君之出矣春去勞我思春去明年來君來定幾時

二龍見

感東宦議立未定

一龍蒼一龍黃黃者不可以為蒼蒼者不可以為黃

過曹氏園值玉蘭盛開

花光何璀璨八牕搖一色春風過酒人忻與花相直
謁采石磯李白祠沽酒不得

先生邀月飲江邊此月年來夜夜懸我念先生對今月
恨無一斗醉祠前

徐弘澤 一首

弘澤字潤卿號春門嘉興處士有竹浪齋集 李君

實云隱君詩喜白香山陸放翁流利清越不為鈞棘索隱 陳仲醇云隱君詩清真流便雅類元白

題画贈李尚寶

風卷長蘆晚雲開積水明沙邊雙白鳥逐我釣船行

周應儀 五首

應儀字元度吳江人光祿寺署丞有南北游草

詩話元度絕句小詩極其纏綿温麗

爛溪 二首

明月溪邊路秋風溪上船船頭何所有滿把水中蓮
我家爛溪邊出門即溪水秋來溪水深處處菱歌起

夏日

風荻蕭蕭日欲斜水邨無處不荷花遙看白鷺忽飛去
占斷柳陰一片沙

夏季風雨大作

急雨斜風百尺樓樓頭殘暑一時收而今炎景成蕭瑟
零落荷花十里秋

聞歌

桃花扇底落紛紛宛轉清歌一曲聞醉殺文園渴司馬
酒壚斜盼卓文君

張大復 一首

大復字元長吳人有梅花草堂集

少年行

連錢細馬繡纏髮翻鐙欹鞍踏曉風鞭指綠楊深樹裏
誰家小袖杏衫紅

王履和 一首

履和字仲美邢臺人

驄馬行 紀乙丑林侍御事

貂璫行驄馬鳴緹綺至驄馬避驄馬欲鳴聲不長君不見昨日新殺屯田郎

祝守範 三首

守範字更生海寧人有非非集戔戔草枕中樹

缶壘室停雲諸橐

雨中過郭四葑畦別墅和王二仲皋韻

隙地新栽竹清陰覆短牆探幽停客舫引興雜飛觴暮
雨沾花徑春流到草堂物情渾可適機事久相忘

哭姑徐孺人訃自蜀中

萬里勞行役經年苦未安風塵多躑躅蘭蕙忽凋殘旅
櫬荆門遠歸魂蜀道難空餘游子淚泣涕滿江干

急雨

野曠雲垂黑山高雨驟昏鳥飛不過樹人急欲投邨暑
氣清疎簟涼飈度晚軒客心愁襪襪賴此滌塵煩

馮嘉言

一首

嘉言字國華慈谿人天啓初諸生有十菊山人詩集

月夜舟行

薄暝南川路相攜上釣舟江風鳴遠樹野水映危樓濁酒高歌處征帆古渡頭月明動幽興擬作五湖游

顧猷 三首

猷字若昔嘉興人有桃花里集

出塞

漢將當年此望鄉高臺雲物自茫茫羌笳漫引孤城月金柝旋催子夜霜木落五原秋色淨草枯千磧暮烟黃材官朔漠聞廉李烽火年來總不防

秋夜泊謝邨

水上人家半掩門寒鴉棲盡欲黃昏孤舟夜泊依紅樹記得唐人詠謝邨

西湖夜別葉環中

水落西陵日已斜濃烟疎柳半藏鴉相逢莫謾輕相別燈火湖頭是酒家

張志遠 三首

志遠字叔明嘉興人有竹嶼吟藁

詩話叔明隱於市廛詩為李九疑太僕所賞句如沙崩樵徑斷水闊野橋危香吹新竹粉翠惜小荷錢太僕稱其清淳穩順不誣也

擬古

日言集卷六十一
十五
七雄事紛爭嬴秦獨虎視阿房亘長衢轉眼成荒壘從
橫一何深翻為逐鹿始豈若魯仲連千古名不死偉哉
達士心榮華安足齒

集慶寺作

參差紅樹倚晴空柳栗行吟度晚風忽憶翠華臨幸處
滿山黃葉寺門東

泛月

烟雨微茫水國秋暮霞飛盡月當樓誰家短笛續長笛
吹墮微霜上客舟

殷仲春 二首

仲春字方叔秀水人有棲老堂集

詩話方叔躬耕永樂南邨陳仲醇贈詩却羨白頭殷處士鵝鵝聲裏獨
耕田是也家居社南諸弟分處邨西之竹橋方叔葭牆茅屋不蔽風雪
慕王績為人亦自號東臯子以醫為業得錢得入市買斷書讀之念
浮屠道士之撰述皆編入藏乃盡收醫書著錄號為醫藏岐黃家以為
總龜焉方叔以天啓
辛酉卒仲醇志其墓

湖上岡

桑柘隱斜日獨登湖上岡誰人攜小榼載酒出菰蔣

仲夏同仲醇子逸伯承秋潭汎舟城西

兩槳夷猶風幔低湖流清淺荻蘆齊相將迎入烟波去
晚泊竹橋西更西

陳元素 一首

元素字古白長洲學生

贈錦衣衛經歷白超宗

參軍也得謁金門莫憾官卑獄吏尊彭澤先生新令尹
參軍以彭澤令調香山居士老聞孫衣歸質庫仍留客印閣閒牀
且校文冷署久淹殊不惡請看三載著書存

黃光昇 一首

光昇字義輪吳江人國子監生有破甕集

懷許受先

玄符綠字細能分家學須知有說文此去橋門摹十鼓
籀書難讀益思君

陸嘉穎 二首

嘉穎字子垂蘇州嘉定人天啓中官主簿有硯
隱集

望君山

木葉下蕭蕭山容更寂寥浮天江縣小隔樹海門遙帝
子何由降騷人不可招無心貪利涉來往信漁樵

如皋道中

滿目桑麻雨露稠白花籬落遶清流家家魚畧邨邨酒
絕勝淮南十一州

吳道 一首

道字實儒吳江人有山響齋詩草

一室

海內誠多故先生一室寬敢期花爛熳粗喜竹平安曝
背晨曦煖推牕夜月寒遠游無勝具四壁有烟巒

周

楨

一首

楨字伯知吳江人有不夜齋詩藁

詩話伯知性最緩嘗與其弟同舟宿有偷兒挾牕入竊其篋伯知審視不語比其弟覺訶之偷兒踉蹌出伯知徐曰吾欲靜觀其如何脫身奈何使彼狼狽而返鄉人傳以為笑其詩流便而乏警策由其懶於推敲也

寄季華弟讀書石湖草堂

青山遙入夢詩寄別愁生雨過添秋色雲開驗晚晴
藤花鋪地滿澗水入池平轉憶湖邊好中宵月倍明

陳

衍

四首

衍字磐生閩縣人有大江集

詩話磐生與徐興公同入曹能始閣風樓詩社而賦才儒鈍光燄鬱而不舒其自序比於春草蔓生秋蟲孤響臣亦自得之言

善才岫夜坐

江烟吐寒燄倒映星河明潮回石勢險孤岫西南傾
扶筇倚危坐仰攀崖樹橫夜色一何曠波濤良未平
奈何羈塵鞅促促浮此生吾愛鄭子真谷口田可耕

送潘子木

送客上高樓樓高望客舟但見帆檣立不見客回頭
始知登遠道兩情難自保

聽泉閣早起

山曉天氣蕭衆星望已空殘雨戀宿雲猶在寒巖東
物象紛勞役明晦互有窮琤瑤石上泉日夜流無終

十不願辭

不願化天上月那得盈盈長不缺
不願化天上星白

日一照不分明 二 不願化土中石受人踐踏無人惜 三
不願化水中灘十步上來九步難 四 不願化牕前鏡十
日不磨光不瑩 五 不願化沉水香煎熬燒灼心摧傷 六
不願化郎馬鞭下馬將他壁後懸 七 不願化白紈扇顛
倒要他遮郎面 八 不願化錦鴛鴦未必雌雄守得長 九
不願化楊柳花隨風飄蕩落誰家 十

吳為霖 一首

為霖字景傳無錫人有白賁集

詩話景傳詩如集場墟市骨董
斑駁陸離即而視之一錢不值

客自澄江歸有贈

浮遠堂前路微風穩放舟江昏茶磨雨烟暝弩臺秋入

饌花雞脆開封綠蟻浮西塘十八里來往候潮頭

詩話浮遠堂在君山宋紹興中建淳熙間李鶴田珏為江陰司法題柱
聯云此水自當兵十萬昔人曾有客三千羅春伯點題名云淳熙丁未
九月既望同侯叔平等九人登君山夕陽在波帆影散亂平淮千里去
鴈無極蒼然暮色自遠而至須臾月出東山之上江水湛然風露清美
不知在人
間世也

吳一元 一首

一元字堯開宣城諸生

冬望

野爨孤烟起灘舟一水膠深林餘敗葉高樹見危巢地
僻無行騎家貧驗素交年年玄草在誰解子雲嘲

戈金湯 一首

金湯字帶如平湖人用泰子

郊游

雨過青山碧四圍春風輕颺百花飛極知良會非容易
馬上何妨酌酹歸

麻三雍一首

三雍字仲雍宣城諸生

自平陽還襄陵道中聞蛙作

三月三日試春衣千山萬山花亂飛行人何處覓相識
啼鳥有時催早歸日漸衝山鞭影急烟初迷樹水光微
草深陣陣喧蛙鼓鵝鴨軍聲似也非

張丑一首

丑字青父長洲人

詩話青父精於鑒古所撰清河書區勛真蹟日錄
時人比之黃伯思周公瑾詩草無傳亦有節度

墨皇齋即事

用拙經營少居閒興趣長閱書宗海岳展画得瀟湘玩
世歌漁父陶情付索郎向平昏嫁畢白首杖枕榔

陳士鵠一首

士鵠字季方秀水人有鍛齋集

秋光好

何處秋光好秋光在狹斜碧添螺上黛黃入鬢邊花蓄
意纏頭錦輕寒繫臂紗江州何必怨任爾聽琵琶

王彥泓十八首

彥泓字次回金壇人

儒學

有疑雨集

詩話風懷之作段柯古紅樓集不可得見矣存者玉溪生最擅場韓冬
即次之由其絨情不露用事豔逸造語新柔令讀之者喚奈何所以擅
絕也後之為豔體者言之惟恐不盡詩焉得工故必琴瑟鐘鼓之樂少
而寤寐反側之情多然後可以追韓軼李金沙王次回結撰深得唐人
遺意起句如雨下春泥月下霜幾年辛苦是蕭郎一層芳樹一層樓只
隔歡娛不隔愁月到西南倍可憐照人雙笑影娟娟中聯如燒燈院落
更未影聽曲簾櫳點履聲當初語笑渾閒事向後思量盡可憐画舫簾
衣凭雪蕩玉箏絃索見春蔥明明可愛人如月漠漠難尋路隔烟臨水
偶來同倚檻隔花何路可登樓封來淚點紅猶濕剪後香絲綠未齊繡
佛像前同下拜泥金經尾獨僉名含毫愛學簪花格展画慙看出浴圖
花下小樓堆燭淚柳邊低舫載茶烟翻成繡譜傳人画會得琴心允客
挑牕下有時思夢笑燈前長不卸頭眠結句如水國不生紅豆于贈君
何物助相思殘陽欲度梅梢盡纔向紅牕拂鏡奩蠟照漸微香地玲瓏
聲纔達画堂東闌干一曲無多地才著思量便渺然仙家合住烟霞外
金屋藏渠也不堪今日席間誰認得舊時家今沈休文分明蠟燭身相
似纔上歡筵淚已零一生長羨金泥蝶顛向釵邊與鏡邊皆饒風韻誦
之感心燿目
迴腸蕩氣

寄懷菽仲秣陵并促歸騎

春光漂蕩別離天心似游絲百尺牽見說人歸歸鴈後

那堪淚落落花前南都翠黛宜為史北里紅箋定幾篇
爭似碧牕銀燭夜月痕依約話纏綿

寄懷端已白門

客懷難耐日初長馬影斜陽踏幾坊花下玉杯嘗苦筍
燈前銀葉試甜香皆南朝風物愁來但禱清溪廟醉後無忘紫
佩囊為覓繡鞵金縷樣倒提纖手學南唐

逋客叔菊筵

幾拍吳歛日漸曛後堂香發卷簾聞登牆雪貌東家子
映燭明姿左阿君花氣與人渾不辨竹聲如肉驟難分
分明玉樹尊前坐知是何人夢裏雲

無聊

把書移枕近牀移歎息觀濤病未能怯暑心情猶喘月
背時風調獨懷冰無勞天女持花散有媿高人選藥稱
竹過小樓言笑否不嫌同上第三層

用陶弘
景事

城樓暝望

魚鱗波面夕陽微旋見遊船續續歸酒後笙歌催急拍
城根燈火喚開扉孤楊傍水疑人立病葉零風似蝶飛
明旦出游晴得否月輪添暈幾重圍

無題

三首

花繞迴廊曲繞梁暗中偏認杜蘭香登樓未定銀翹顫
避燭難禁鳳屐狂怕見月痕催月姊恰宜秋色對秋孃
持裙半刻留仙住纔隔紅簾便渺茫

夜飲朝歌晝未眠輕狂全是倚孃憐妮他細語挑鍼綫
替我悲愁肄管絃夜月不移歡枕畔

借用不
夜珠事

春山長坐酒

壚前何當羨玉親磨墨立到琉璃硯匣邊
怯上蘭舟細步來笑看波影按金釵陳王著眼先羅韞
溫尉關心到錦鞵把酒熨衣容旋學摘花烹茗任頻差
船孃為近牕紗泊免踏前門月露街

有贈

秋風長簟恨三年續命曾聞喚小憐已向綠珠稱弟子
儻容張碩伴神仙筵前笑顧櫻桃擲燭下偷分茉莉穿
端似悼亡唐後主見伊枝葉又情牽

代所思別後

阿姚

相逢羞澀怕猜嫌別去那知悵恨添獨對鏡奩空怏怏
乍拈鍼翦復慊慊夢魂弱絮從風亂心緒繁花被雨露
悔不暫留歡且住未妨長隔一重簾

續遊

嚴城間阻夢魂通小市門東更向東翦燭寄聲書草草
背燈彈淚去恁恁花繁竹暗應迷路蝶趁鶯梢有便風
梅蕊膽餅看漸減每朝分插到釵叢

賦得別夢依依到謝家

名花偏作隔牆枝愛影憐聲入手遲門第敢言非道蘊
才情端喜是芳姿桃邊未許裙題字子敬事柳下曾將帶乞
詩今日眼波微動處半通商略半矜持

左卿阿鎖

玉淨花明秀出羣左家重見舊時芬因披樂府吟嬌女
便上藩車訪阿君見陳遵傳素豔乍看疑是月清歡何暇想爲
雲那禁手炷熏籠罷笑遣蕭郎覆画裙

追和唐女冠魚玄機十二韻

閨門文采羨玄耽更有青溪妹第三生小不闌青瑣閣
家常希換白單衫釵梁風定蟲猶顫裙衩花深蝶競銜
雅謔引經推鄭婢狂詩送抱想吳男紅兒詩裏歡兼恨
素女圖前笑帶慙想見隔屏聲矻矻似聞昵枕訴誦誦
加餐意託琉璃匕寄札愁憑瑇瑁簪古詩何計通音
信蓮花玳瑁簪豈有鵲
頭能助憶願爲雞舌與君含遙猜蹤影心先妒未接言

辭性已諳體自生香防姊覺者能為語任郎參髮光可
鑑千盤滑脣味如飴一嚙甘記得那時偷近處唾絨紅
點碧牕南

寒詞 三首

從來國色玉光寒晝視常疑月下看况復此宵兼雪月
白衣裳凭赤闌干

夜迢迢更路迢迢澹月飄燈自過橋想得阿嬌燃燭待
也應初換第三條

牕樓映日滿樓明雪豔初臨曉鏡清良久自看還獨笑
不防身畔立御卿

過婦家有感

歸寧去日淚痕濃鎖却妝樓第二重空剩一行遺墨在
丙寅十月十三封

王清臣 一首

清臣 潁州人

王貽上云天啓初潁川張遠度買田潁南地多桃花
林一日攜榼獨游見耕而歌者聽之所歌皆杜詩也
遂呼與語自言王姓清臣名舊有田畏徭役盡委諸族為人
傭耕遠度過其廬見舊曆紙背以煤書所作詩其一篇云云

述懷

人生如泛梗飄飄殊無根飲啄得幾許營營晨與昏對
此春日好荷鋤出南原近觀草色敷靜聽鳥語繁有身
貴適意窮達安足論

明詩綜卷六十七

明詩綜卷六十八

小長蘆 朱彝尊 錄

休陽 吳元鋹 緝評

張采 一首

采字受先太倉州人崇禎戊辰進士除臨川知

縣升補禮部主事

靜志居詩話婁東二張狎主復社盟書吉士身後詔求遺書通邑大都家守其學儀部名雖少遜然里門作志留都議禮考文徵獻比於吉士多功

九日同子常東郊即事

郊行尋野勝秋遠菊花天溝曲初移逕溪深好放船冷
楓當岸落高柳隔籬穿試共登樓望寒城起暮烟

周 鑣 一首

鑣字仲馭金壇人崇禎戊辰進士授南京戶部主事轉禮部郎中削籍尋起禮部員外郎為阮

大鍼所殺有十四哀詩

詩話仲馭以鈞黨受禍與雷僉事續祚同繫請室於時御史王懔阿阮大鍼意上疏請斬二人既而懔吉服承旨入獄續祚謂仲馭曰王懔能斷我首邪荅曰不斷我首吉服何為乃各作家書訖又互書先帝遺臣四字於腹遂雉經死僉事遺命家人勿葬仿伍子胥抉目遺意置棺雨花臺未浹月而留都不守矣方大鍼得志思盡殺東林復社諸人及僧大悲獄起與張御史孫振謀倡十八羅漢五十三參七十二菩薩之目希阱諸異已者因馬輔士英不欲而止士英有詩云蘇蕙才名千古絕陽臺歌舞世無多若使當年不相妒也應快殺寶連波蓋以蕙擬劉副相宗周而以陽臺喻大鍼也

孝子魏君學泚

有鳥栖中林夜半巢忽覆兩羽既傾折遺雛寧復覈嗟哉魏公子痛父無能救乞食向長安知交孰肯覲投書數千言聽之耳如褻世路已如斯呼天但搔首扶櫬江南歸墓翁日相守父存不敢先父沒不敢後含涕入下泉一死良無疚

呂大器 三首

大器字先自遂寧人崇禎戊辰進士除行人歷兵部左侍郎甲申以吏部左侍郎回里有集

詩話呂公驅馳南北盡瘁行間五言如野寺依巖立官衙倚水開孤燈寒殿壁落月映山城土瘠蟬吟屋林疎月上扉野狐衝馬立山鬼伺人驕精衛悲街土鷓鴣啼滿山雲烟春尚在烽火畫相連淚盡銅駝棘歌殘玉樹花豈無丹闕戀終抱白雲思忠孝之誠溢於言表

閒居

好山當面出旭日敞幽軒煨芋聊充飯烹泉不問源譚

明言集卷之六
二
玄藏史李學稼小人樊數得林間趣花開鳥亦言

晚次江門

世事何年定江皋且振衣樹紅橙子熟濤白鯉魚肥獨
鳥衝烟去殘霞壓岸飛邨醪無處得空對月光輝

落索河有感

百折波濤險一泓山澗清天高雲黯淡巖老石崢嶸古
洞都成穴諸峰盡築城版圖猶蜀界風土半秦聲杜宇
啼方歇銅駝歎未傾旌幢連赤縣烽火到神京發婦徒
存恤羣臣孰請纓傷予才略淺深媿李西平

姚思孝 一首

思孝字永言江都人崇禎戊辰進士改庶吉士

授戶科給事中歷兵工二科謫江西布政司照
磨稍遷南國子助教升南太僕寺丞轉光祿少
卿再轉大理少卿

康山

康山一簣草萋萋無復豪華似許西猶有揚州舊時月
翠禽飛上玉梅啼

葛徵奇 三首

徵奇字無奇海寧人崇禎戊辰進士除中書舍
人選授湖廣道御史升太僕寺卿轉光祿卿有

蕪園集

詩話光祿樂志林園又得閨人
唱和格雖未高亦自超超拔俗

晚眺隅園

三月十日雨薄霧花濛濛小大澗壑鳴百道源相通潭
魚躍新水園竹抽春叢禽鳥忽變聲迺知天氣融登高
一以眺澄覽衆慮空玄理羣所貴耳目悅且克於焉坐
垂釣自擬滄浪翁

武林留別吳梅里

昨喜逢初地蘭缸夜雨紅故人相爾汝今日又西東楓
落前山樹蘋開別墅風小牕涼月靜客夢與誰同

題画芙蓉

秋來烟水多蘆葦渺難即愛此江上花日坐雙鷓鴣

冒起宗一首

起宗字宗起如皋人崇禎戊辰進士除行人升
南京吏部主事歷郎中出爲山東按察僉事遷
湖廣布政參議

同年朱泰符過訪衡陽余已遄發襄州矣吾兩人
同一不偶乎

秋老蒸江獨鴈飛相思命駕重依依久拚歲月頭俱白
堪笑風塵事益非地主忽從交臂失天涯安得泣舟歸
兼聞親舊多顛顛悵望鄉關淚幾揮

葉重華一首

重華字德玄崑山人崇禎戊辰進士除工部主
事尋改禮部歷員外郎中出爲浙江布政司參

日言錄卷六十八
四
議轉河南按察副使遷山東廣東參政

從軍行

吳鈞雪色滿天山血戰黃沙萬里還但願畫圖麟閣上不須生入玉門關

吳載鰲一首

載鰲字大車晉江籍宜黃人崇禎戊辰進士除澄海知縣謫浙江按察司照磨升金華推官入為戶部主事歷員外郎中轉廣東按察副使改授翰林院侍講

姜給諫以五羊石見貽賦謝

文饒平泉莊有石自言好何如初平羊眠雲嚙瑤草

李奇玉三首

奇玉字元美嘉善人天啓壬戌會試中式崇禎戊辰進士選武學教授遷國子博士歷南京工部主事改兵部員外由郎中出知寧國府有雪園遺草

潭柘寺讀書

讀書潭柘巔身在白雲裏開軒豁遠眸風瀑洗心耳古木挂青蛇云是二龍子下方鐘磬餘僧寮各棲止山童剔殘燈埽葉烹泉水闐然羣籟寂明月射牕几

過京口

蕭條書劔下關河芳草萋萋客裏過原上鶯花三月暮

明言總卷之六
天涯愁病一身多海門帆影移青嶂山寺鐘聲到綠蘿
入望自知鄉國近那堪斜日聽漁歌

山居

方花礎潤氣氤氳靜對薰爐柏子焚夜半雨聲新水漲
枕邊流出一溪雲

顏俊彥 一首

俊彥字開美桐鄉人崇禎戊辰進士授廣州推
官被劾再補松江推官有

集

邨居雜興

病卧經旬滿面埃梅花落盡杏花開画梁無數空巢在
社雨蕭蕭燕不來

龔士驤 一首

士驤字季良義烏人崇禎戊辰進士溧水知縣

惜取

惜取檐前葉休教落地輕夜牕留聽雨葉葉是秋聲

萬壽祺 二首

壽祺字年少徐州人崇禎庚午舉人有隰西草

堂集

詩話年少多才多藝詩亦
清逸無怒目掀髯之狀

憶錢大

忽憶南徐道春風樓上年晚鶯移浦樹苦菜秀沙田驛
路歸人少蛟門落照懸如何問津者五載滯江船

入市宮

泗亭春盡樹婆娑漢帝宸游不再過魂魄有時還至沛
樓臺落日半臨河風吹大澤龍蛇近天入平沙鴈鶩多
我亦遠隨黃綺去東山重唱采芝歌

魏冲 三首

冲字道用嘗熟人崇禎庚午舉人有小碎集

采蓮曲

北渚采菱歸前溪采蓮去無端墮玉釵記在迴舟處

元日

年年悲作客今日賦閒居春草生新夢山花滿舊廬畏
人書謝病示儉食從蔬問字吾何有無勞長者車

春晚

梅葉初齊梅子勻新榆穉柳暗通津春深莫惜餘花盡
却喜黃鸝不露身

陸坦 二首

坦字履長蘇州嘉定人崇禎庚午舉人銓授南
豐知縣不赴隱居鄧尉山有庚除詩藁

和姚修民簡寄

世逐浮雲換身同落葉輕難忘百年恨誰殉一朝名去
國懷公子憂時過賈生江皋無限淚日暮不勝情

春夜雪

春雨聲聲入夢闌暗牕風動曉燈殘濕雲壓竹鳥驚墮

起看空階一片寒

徐柏齡 三首

柏齡字節之嘉興人崇禎庚午舉人署永嘉儒學教諭

詩話孝廉湖海播遷詩不猶入自出杼軸

春日

風聲起松末窈若萬壑深誰謂市井喧遂無天地心可惜天桃花不言萎空林明年縱復開顏色不如今

壽寧逢艾千子

白日黯無色城門掩半開故人何地別間道此時來鄉夢遠難寄官程近莫催江關庾開府詞賦不勝哀

江心寺文信國祠

孤嶼浮江面寒潮撼石根遙遙箕尾外何處可招魂

張溥 一首

溥字天如太倉州人崇禎辛未進士改庶吉士

有七錄齋集

陳卧子云天如忠愛誦孟門行可見一斑卒後而動聖主之思有以也

詩話天如狎主復社以附東林聲氣求龍集鳳會一言以為片旦四海重其人倫書畧刻而百函實晝日以三接由是青衿胄子白蠟明經登李元禮之門不啻虬戶為柳伯鸞所識勝於筭金列郡人文一時風尚口談朝事案置漢書頭包露額之中足著踏跟之履和歌下里擁鼻東川俄而哲人其萎踐康成之妖夢天子有詔求司馬之遺書黨論日與清流釀禍周之夔彈之於始阮大鍼厄之於終而邦國因之殄瘁矣

孟門行

雙絲繫玉環宛轉生光澤本以結同心何知反弃擲君家美酒琥珀光紅顏少年坐滿堂酒酣意氣不可當君

家玉堂盛孟門孟門深谷無朝昏中有美人嘯且歌仁
義結客客自多相與醉君金叵羅黃雀銜環報舊主畏
君彈射遠飛去夜深孤棲城北樹李舒章云得
崔顯之神

吳太冲一首

太冲字默寘錢塘人崇禎辛未進士改庶吉士
授簡討升南京國子司業轉右中允有息心窩

詩集

陸永修云先生林
下之詩勝於館閣

朱美之攜酒過

綠陰叢裏放玫瑰石几相延坐碧苔百里雙鉞春酒釀
一年幾個故人來厨丁細切溪頭筍穉子貪爭屋角梅
信道朱游能折鹿譚經且喜得相陪

姜

塚八首

塚字如農萊陽人崇禎辛未進士除密雲知縣
改儀真入為禮部主事選授禮科給事中以言
事廷杖削籍戍宣城有敬亭集黃九烟云先生詩發乎
性情本乎忠孝名實交

手纏繚盡致

錢幼光云先生詩大抵取

法於柴桑浣花其志同其調不覺其同也

詩話廷杖與東西殿錦衣衛鎮撫司獄用刑之酷前代未有自王振亂
政鞭撻朝士大臣有枷項者迨成化中汪直用事廷杖臺省巨王濬李
俊等五十六人正德間以諫南巡杖舒芬黃鞏等百三十八人死者十一
人嘉靖初以爭大禮哭左順門杖豐熙等百三十四人死者十七人此
其最甚者矣萬曆六年論首輔張居正奪情杖趙用賢沈思孝鄒元標
等五人後定陵頗厭厭建言諸臣疏多留中廷杖寢不用至天啓四年太
監王體乾奉勅大審復開其端重笞戚臣李承恩以悅魏忠賢於是主
事萬燝御史吳裕中相繼斃杖下而許顯純田爾畊輩煩刑以逞備極
慘毒楊左諸君子之禍有不言者矣思陵即降雪消見曉用獄稍平
不意嘉魚熊公暨萊陽姜公論列柄臣時日輻輳逆鱗既觸天怒莫回
拷掠之慘洵九死而一生者蓋至柄臣自裁而兩公之荷戈終未見釋
姜公臨沒語其子安節實節曰敬亭吾戍所也戍者吾君所命吾未聞

後命而君亡吾猶罪人也死必埋吾成所乃葬宣城公晚歲始為詩風格一本杜陵其自序云託哀鳴於異鳥感音節於候蟲可謂善於喻物也者

秋懷

仰視雲中鴈飛鳴何翩翩朔風自北來玉塞起塵烟昔
聞漢武帝防秋守九邊拓疆猶未已奄忽下重泉哀哉
重泉下玄狐陟其巔大江萬里長下有蛟龍淵回頭夜
怒號聲怪震百川我欲往從之褰衣不得前願言長相
憶中心淚漣漣

和陶輓歌辭哭左侍郎仲及

大風自北來寒木正蕭蕭多少舊墳墓不知在何郊獨
君三尺土高山共嶢嶢我來拜君墓手折白楊條所取
非楊條荅贈在今朝君死則已矣我生可奈何我豈貪
生流母老強還家既為君作傳又為君輓歌生則託金
蘭死當告山阿

發使東歸

城南薄田十八塋高者桑柘低稔稔白日黃狐牆頭立
既不殺之當與捐

曾青藜云稟兀

簡余寒鐵

自我不見余秀才夏云徂矣秋風來我今一到秀才宅
堂前堂後生蒿萊丈夫翫麟只如此誓欲破家去鄉里
今日路旁一匹夫當時萬言干天子低頭俛眉心不辭
養雞牧豕身應爾君今讀書停雲館仰天狂歌何行行

有時野老扶杖過烹葵摘果酒先煥白公隄上波欲沒
期君同看溪雲滿

赴戍宣州衛

垂死承恩譴天威咫尺間荷戈荒徼去收骨瘴江還袞
職猶思補龍顙竟絕攀橋陵千滴淚獨在敬亭山

鑿江雜詠

老去人猶在春來客未旋側身天地外卜宅水雲邊月
照歸栖鳥江喧出口船苦遭生意短白髮不相憐

九日登越州稷山和弟垓

萬木凋霜嶺千巖帶水邨雲屯山郭靜朝過海門昏
帽風堪落黃花酒正溫愁聞江徼外鳴鏑滿中原

送林衡者還嘉善

相知不在久岐路莫頻驚客舍由拳地鄉心夾漈城霜
前孤鴈白雨後一湖明為報余生札平安問舊京

周 燦 三首

燦字光甫吳江人崇禎辛未進士知宣化會稽

二縣選授浙江道御史有澤畔吟

陳皇士云侍御詩彬
彬有序大雅之音

丹青引贈顧子

山莫画泰山松松樹已受秦皇封水莫画黃河潦河流
已非夏后道但作清溪竹樹灣添我垂釣於其間吁嗟
乎男兒少壯隨朝彥豈料中年桑海變枉想丹青麟閣
中他人為我開生面顧生顧生爾莫嗔傳神似爾画逼

真如何貌此尋常人

韓蘄王碑

西湖湖曲騎驢翁中興十將稱最雄道逢姦相但長揖
斯人豈比張魏公鄂王英武庶其匹時危協力扶王室
龍王廟前金鼓震遺恨書生黨兀术公之骨埋荒墳公
之烈存碑文華堂鐵券雖已失千載猶傳趙雄筆

徐電發云辭不
多而激昂流轉斯人豈比張
魏公一語足慰蘄王於泉下

鄰翁邀食五月桃戲作

桃實累累也足豪主人笑釘玉盤高仙家一熟三千歲
五月先嘗遜我曹

許 牙 一首

牙字玉斧候官人崇禎辛未進士除戶部主事
歷員外郎出為浙江按察僉事以叅議提督學
政有春及堂詩

建州逢陳德輝

已分別離久何期此地同西城山路近南浦野橋通信
宿情何極他鄉歲欲終維舟無限意相對有飛鴻

送友之瓊州

匹馬珠厓路須防瘴嶺雲蠻童青箬笠黎女綠蕉裙潮
有東西候時占朔望分臨岐還把臂不敢說離羣

春日送客

春光初荏苒客路惜分攜露濕鶯花重風吹燕麥齊孤

燈茅店裏殘月柳橋西別思千峰外猿聲不住啼

黃坤五云玉斧

五律聲調委婉趣味澄幽誦之如流水平橋佳趣自在

張鳳翥 一首

鳳翥字儀明一字威赤宿松人崇禎辛未進士除嘉興知縣補仁壽升刑部主事歷湖廣按察

副使

詩話張公牽絲作宰以慈得民晚節禦侮危疆吮血裹瘡接戰而死忠勇不可及也詩又安雅絕無叫囂之氣

武陵道中

孤城臨古渡斜日一舟橫北渚離人目西風遠客程藤疎知樹冷擢響信江平不用分漁火前洲月已生

于 穎 一首

穎字長公金壇人崇禎辛未進士除工部主事歷員外郎出知西安府削籍尋復工部郎中知順德紹興二府升浙江按察副使分巡寧紹道

新歲次茂貽韻

不覺流光度霜華入鬢邊難忘惟舊雨相對又新年學佛寧遺世為農敢問天椒花一相勸身世各悽然

管正傳 一首

正傳字元心長洲人崇禎辛未進士除永新知

縣調贛縣有積書巖詩草

詩話元心詩思入微原本易林太玄當其意匠經營幾欲效修羅遁跡藕絲中然猶取材於古故方之徐元歎張草臣諸子較勝一籌

西泠橋

斷嶺寒烟落晚鴉
聞聽漁鼓傍橋過
誰知湖上彎彎月
又照錢塘蘇小家

薛

案

一首

案字諧孟武進人
崇禎辛未進士
選武學教授
升國子助教
轉南刑部主事
歷郎中出知開封
府晚為僧號米堆和尚

金陵

野曠風鳶捷江空石燕輕
年年春草綠不忍上臺城

成仲龍

一首

仲龍字為霖長垣人
崇禎辛未進士
除夏邑知縣
調永城選授兵科給事中
出為浙江按察僉

事轉參議遷陝西參政
歷布政使有東壁樓集

除日立春

除日今朝是蹉跎
又一年歲從燈下改
春訝曆頭先柏
酒愁無分柴門靜
可憐半生成底事
兩鬢已皤然

劉應迪

一首

應迪字簡在金谿人
崇禎辛未進士
閩中知縣
曉起

曉色漸熹微
柝聲聽漸稀
月潛銷客袂
燈已失林扉
竹外風翻冷
花間露欲晞
巢烏棲未穩
先上女牆飛

王

斥

二首

斥字王屋蘭陽人
崇禎辛未進士
滋陽知縣有

王王屋集

詩話王屋嗜奇鞭驅險句觀其起釁宗藩自理一疏辭艱晦而不舒在納言難以封進乃以未將金幣自尤尤人得毋過與

謫歸曉經中山

長安日以遠古道風淒淒草濕蛩聲緩林深鵲起低殘
兵親廢壘孤客度危蹊去國莫悲戀一枝不借栖

病卧聞砧

白露蒹葭老西風梨棗肥可憐人病卧翻羨鳥高飛藥
竈縈秋草藜牀帶落暉那堪砧杵急盡力擣寒衣

張明弼 一首

明弼字公亮金壇人崇禎癸酉舉人揭陽知縣

有螢芝集 俞右吉云公亮經生垂白始領賢書過一人知己津津不置

金陵送胡常之歸九華

目極秋江隱碧山九峰想像有無間孤舟此去同鳧鴈
知宿蒹葭第幾灣

陳宗之 十一首

宗之字玉立長洲人崇禎癸酉舉人

詩話落禎間景陵流派盛行於吳中雖有林若撫力持唐調然而捷敏未免率易玉立矜鍊獨操正始之音八門七堰六十坊可以獨步

擬陶 二首

藹藹堂前木時至忽成林首夏方澄和凱風散幽襟我
愛白日靜觸物每微唵息影盤石邊時鳥懷好音鼠壤
有餘蔬東醪聊自斟雖無高世軌撫已安夙心先師有
遺言謀道匪自今已矣何所羨林栖豈在深

人生無定轍榮辱隨所遭豈無賢達心屈跡沉蓬蒿老
萊安葭牆仲由甘緼袍較量軌迹間與世竟孰高不恥
一身之所傷生民勞風塵暗畿甸溝水事枯槔清夜起
長歎念之首重搔安得田子春節義稱士豪雅志雖未
申良足媿滔滔

世化

往聞漫翁言日月化豺虎斯語恐未然含疑不輕吐及
乎遭世喪所遇賊聽觀中原延寇氛蕩析無寧宇菰蘆
一方地荒疫亦愁苦天高吏肆酷法密民罹苦人鬼須
臾間牽率歸黃土安得山阿栖飲泉采芳杜緬懷盛年
時邈若羲皇古

漢道

漢道昔云季四海沸羣雄賢士失綱維奔竄投西東管
寧栖遼海田疇隱無終鄭玄與王粲各自獲所從如何
盛明世栖栖泥淖中雨雪積荒塗渚田路不通寧無北
門歎要自秉固窮疾耕寡樂郊仕宦乏奇功乾坤雖浩
廣無隙置薄躬愴惻衡門下憂來溯悲風

悔

磽田不可耕濁水不可釣常思汗漫游高卧青山嶠此
意更莫酬蹉跎失年少讀書近浮名趨俗失要妙幽幽
寒溪側寂寂孤燈照故牀擁敝裘密雪陷爐銚兒飢每
索錢愁來獨悲嘯

登翁漢津水臺

朝卧采山堂暮登漁山閣漁采俱在山始信湖中樂閣
盡有高臺宮堯出寥廓茫茫笠澤帆隱隱浮屠嶠峰秀
無匿覽波光恣開拓始冬似佳秋風日猶晶灼古樹儼
當階黃葉深未落葛翁不可招丹竈安所託空餘泛宅
游未踐褰裳諾宿契必有期無怨猿與鶴

游金菴

放櫂非有期泛觀湖中山偶然入幽境遂叩高峰關老
衲出肅客蒼顏映丹顏同坐絕壁下始知身世閒飯我
青精香供我綠菊斑葑山背已沒金菴徑可攀歸塗歷
清溪荒寂幾灣環萬堆黃葉中清磬激潺湲月出每孤
往又逐漁舟還

病橘

病橘含辛實淒然墮曉風本無雕飾分敢恨託根窮斷
續陰依井低昂鳥啄蟲可憐冰雪後剩有一枝紅

周青士
云蒼老

綴工

感時

花石綱看艮岳移麝香裙冷護宮衣紅燈小隊湖游夜
知否襄陽六載圍

寄衣曲

前庭踏鞠後庭歌主將功高意氣多不信沙場征戰苦
年年擣練寄金河

秋山即事

宋朝自名种明逸漢室何知鄭子真今日徵君何草草
馬蹄手板拜紅塵

李天植

五首

天植字因仲平湖人崇禎癸酉舉人晚更名確

字潜夫隱居龍湫山有蜃園山游諸集

陸次友云因仲高蹈

詩多激逸合乎清江碧嶂之音

詠史

秦皇制六合焚書築長城萬古以為罪孰為原其情典
籍付煨燼大易道獨行豈識理數原尚留天地精紫塞
亘萬里外内界則明春秋重此義茲尚存典刑後世經
術儒勦說日以橫胡然南面尊不取城下盟祖龍而有
知其氣殊未平

雪夜泊舟許墅

朔雪沉宵柝江關卧未安
牕虛得疎響舟重壓新寒
梅落倡樓笛蘆垂釣子灘
鄰航催曉發得共月華看

游青蓮寺

香刹從來古春風客到稀
溪光平入座竹色冷侵衣
地僻鳥無語林深花自飛
相過逢勝侶竝坐話清機

獻生賦謝鄰叟

瓜蔬吾所愛分惠媿芳鄰
不忍私佳種還期及令辰
青囊珍重意白髮老成人
生計憐余薄時來話苦辛

山中訪宋爾垣

風吹帆影過西城一片浮雲嶺上晴滿地落紅都不掃
萬松臺畔讀書聲

謝 遴 二首

遴字彙先宜興人崇禎癸酉舉人有是亦樓存

稟

詩話孝廉晦迹衡門種菜一畦不入城府陳檢討其年寄懷詩云半畝
牛宮繞菜田鉏畦汲水獨悠然芒屨一輛千金直不踏城中二十年其
詩頗效林逋魏野

銅官山書齋

坐卧深林裏牕開別一天山腰埋宿雨石面瀉流泉路
盡雲猶觸邨分樹尚連烟霞吾所戀只此可忘年

河間道中

猶復驅車去行蹤何處留閭閻移馬廐市井割鴻溝草
濕王孫淚塵淹季子裘那堪鬼車烏風雨夜啾啾

陶汝鼐 四首

汝鼐字仲調一字燮友長沙人崇禎癸酉舉人

有榮木堂集

詩話先生壯歲好游自吳入越與先人訂僑札之分嘗留樵李度歲晚
際世離出監軍事捍禦鄉邦著力暨章堵兩公盡瘁略同讀哀湖南賦
悽戾過於蘭成詩雖未脫景陵之派然覺爽氣殊倫

京山道中探觀音巖尋磴掬水歷巖上下古木峭
壁高瀑競響舊有李本寧先生園今廢愴然有作
層巖近大道其麓如深邨僧包立樹下過橋知寺門庭

明詩經卷六
前雙老榦一為娑羅根虛閣覆巖壁滿屋蛟螭痕飛流
響石罅奮躍探其源涓涓出澗尾色白河崑崙掬飲泉
上下微覺分清温巖阿受夕陽偶坐如朝暾戀賞勿忍
去出溪松路昏惜哉平泉後亦不理茲園

金正希招集練江醉宿清淨寺

冬霜萬壑陰江永日將夕画舫泛容與川暝光愈白急
風吹燭花谷響合歌拍小榼僧厨來蔬笋界方格語笑
酒易傾如以桐叩石柱史如枯禪城市無一宅酒深思
啜茗同作虎溪客貝葉啓禪書梅花落瑤席坐久聞妙
香一榻隨所擇睡鄉鐘鼓鳴林鳥翻旅翮吾亦步下山
佛燈猶照壁

嚴州道中

曲江流不盡寒氣凜初嚴野泊紛漁艇遙帆類酒帘枯
河冬雨活濕壁凍雲黏不分多歸思蕭蕭與夢添

哭亡弟彞幼調

孝友人皆見居家母最憐不留娛白髮非意及黃泉鳩
杖難消噎驪珠易返淵老兄千斛淚不敢墮親前

陸清源 一首

清源字嗣白平湖人崇禎甲戌進士除增城知
縣擢雲南道御史巡按福建後為馬士英部將
趙體元所殺

答黃石齋先生

明詩紀卷之六
十九
問俗停車到海濱羽書詎敢計安危孤城吹笛思當日
中夜聞雞豈異時北望烽烟勞夢遠東瞻林墅出山遲
蒼生極目堪流涕何日綸巾一視師

傅巖 二首

巖字野倩義烏人崇禎甲戌進士除歙縣知縣
擢江西道御史有花巢詩橐

庚辰元旦

曉起看雙鬢居然比昨非趨朝人語早掩幔客來稀酌
酒分居後傳柑秩尚微遙思故鄉會是日定春衣

姑蘇早發

吳閶西去片帆輕野樹微茫水國平一夜櫓聲搖月影
不知枕上過菰城

文德翼 一首

德翼字用昭德化人崇禎甲戌進士除嘉興府
推官擢吏部主事有燈巖詩集

池口阻風

伸腳蓬牕西日移打頭蘆渚北風吹沿城路僻多蚊蚋
到夏江深少蛤蜊山色杳冥歸謝朓笛聲惆悵憶桓伊
頽年自笑滄洲客破浪那能萬里期

吳本泰 二十一首

本泰字美子一字藥師仁和人崇禎甲戌進士
除行人選授吏部主事改南京禮部歷郎中有

海粟堂集秋舫箋北游西征東瞻南還嶽游諸

草

周青士云吏部五古出入選唐竹枝宛轉猶存老鐵遺響

詩話吏部當正聲微茫之日獨操大雅之音而揚托風雅者或不及焉益信曲高者和彌寡也

帝京篇

崇禎元年作

夢想黃金臺來歌白石粲明明聖人出旭日天方旦廣
殿飭梓材神霄聳輪奐薇垣格澤消芝蓋卿雲縵三吳
器機杼九廟秉珪瓚下國頌時雍至尊理宵旰宵旰懷
殷憂邊籌寢弛翫軍需飛檄催水衡仰屋歎大姦已距
脫羣疑未冰泮漸鴻雖可儀羔羊不聞讚名盛實則衰
事倍功乃半因之勅幾康匪伊游泮奐君既勤晝接臣
當思日贊朝中去朋黨政府參謀斷網必挈其綱編先

理其亂求治毋太速防微勿滋蔓所期日月光幽遐理

必貫

朱近修云通篇沉著不浮

靜海道中大風

海人行海國謂應狎波濤波濤湔不見曠野天風號寒
日澹無光動地卷白茅疑有鐵騎驅鼉突鳴弓刀離羣
慘孤鴈失木傷哀孫中車紛欲裂簸蕩如輕舠四射中
肌膚一寒欺復陶豈關造物意人事或偶遭方鴛萬里
轉寧憚險與勞

任丘張氏園藍田先生授經處

不識魚君陂幸識魚君令城隅敞臺榭水木相翳映謂
予此棲遲差可間眺聽是時秋氣深白露漸蘭徑瘦石

明詩紀卷六
三
裏苔斑寒花棲蝶暝女牆邏柝喧梵閣宵鐘應慮澹羣
物輕時危百憂并皎皎明月枝驚鳥棲不定茗牕靜披
覽冥緬獨無竟昔賢曾授經履履痕猶賸

臨淮道中雪

昨日春氣暄僕夫俱喘汗今晨北風厲雪花卷行幔天
時自迴薄人意驚錯換况乃事徂征惻惻羈魂斷長淮
望不極鍾離道方半踉蹌赴郵程渺瀰惑阡畔暝鴉寒
不呼翻飛忽零亂車上冰滿髭車下泥沒骭紅燭映深
簾寧知旅人歎

陋巷井

改邑不改井泠泠無古今原泉何方來或是泰山岑仰
之既彌高俯之亦彌深屢空其庶而澹然助齋心仲尼
飯疏飲應與共酌斟禹稷憂飢溺易地同所任至味無
異旨樂哉此中尋

秋雨歎

晨雞喔喔天未明潰垣忽作崩雷聲裳衣顛倒書帙亂
蒼茫四顧心獨驚陰厓潭水深千尺飢蛟掉尾盤渦黑
我欲拔劍往斬之出戶踟躕三歎息

賦得草徑入荒園

匝地靡蕪綠戎戎接短垣路迂隨鹿引邨靜覺禽喧
露沾芒屨頽陽卧瓦罇園丁渾解事野菽具盤餐

秋住湖口

明詩紀卷六十八
五
雨夜官城暗霜期候鴈呼瘦筇黃葉寺高枕白雲湖歲
月傷羈客烟波狎釣徒醉吟楓落句秋思滿東吳

冬日邨居

短景催年盡荒齋擁膝安甘蕉經雨敗叢菊抱霜乾閉
戶腰肢健干人齒頰難得閑能幾日杯勺此盤桓

候舟

浦口千檣集占風信宿遲長雲鴻沒影古壘樹無枝人
語殊方雜客心孤月知湯湯濁河水利涉問舟師

阿城逢秋

野棗青未熟渚蓮紅欲銷涼風髡鵲頂新水長魚苗江
上客星小亂餘兵氣驕秋來無別夢長咩鹿門樵

由歙邑入海陽

淺瀨無舟渡迴溪有路通獨行過市上元只在山中薺
麥搖晴綠林蕉逗晚紅清鐘隔巖寺留憩聽松風

庚申中秋

叢桂生陰雨氣涼少焉月出四山蒼于飛鵲繞樹三匝
所謂人居水一方素蕩紅菱秋饌美画船烏榜怨歌長
徘徊顧兔傷流景爭乞雲英玉杵霜

任城將南還半舫先生餽酒走筆言謝

李白樓前黃葉洲欲發不發仍淹留青氈近對許主簿
白衣恰送王江州五侯掉頭那肯顧一杯入手百不憂
讀公新詩飲公酒醉眠松石風颼颼

寒食感事

南朔城荒春到稀
西山雪盡尚沾衣
別來桃李三年夢
老去兵戈萬事非
行腳出家猶有累
低眉獻賦不如歸
試看縣上神林近
野爨無烟空淚揮

西湖竹枝詞

五首

西湖湖水碧琉璃
西湖楊柳綠茸絲
愛殺桃花紅片片
却似西施好面皮

繆天自云此用唐人
迴波樂辭不為麗也

與郎暗約段橋西
早起妝樓欲下梯
宿雨半收晴不穩
惱人最是鶉鳩啼

薺麥青青三月三
看看草色暗湖南
忙催姊妹燒香去
戴勝來時又養蠶

放生池岸柳叢叢
香閣鈴旛四面風
輕薄少年乘醉過
手提射鴨竹枝弓

踏青湖上懶歸家
更愛山行輦路賒
妾上笨車郎跨蹇
西溪十八里梅花

春曉

南來消息斷歸鴻
江國迷春曉夢中
斜帶參星杏花白
依稀牆半宋家東

凌世韶

一首

世韶字官球
歙人崇禎甲戌進士
除寧化知縣
謫江西按察司簡較
改興化府經歷
升處州府推官
入為戶部主事
有汭沙草

陳皇士云汭沙廉吏
晚素家隱黃山詩有

清韻

惠州西湖

湖面寒光一鏡平
露荷烟草入秋清
白鷗浴罷各飛去
遙見潮痕郭外生

周之璵 四首

之璵字玉鳧長洲人
崇禎甲戌進士
除刑部王事
歷禮部員外郎

讀史感懷

石羊埋棘漆燈冥 一作熒
短犢橫牽上廢亭
金盃更從何處覓
春深杜宇哭冬青

詩話玉鳧讀史感懷六十首援古驗今不與國風小雅之旨

漢皇恭儉百無營
衡石投籤久勵精
端為黼宸求治速
翻教安石誤蒼生

寶帶橫鞞建碧油
居然鞦韆閣東牛
未聞奏捷傳淝水
又見稱兵犯石頭

叅軍空自賦蕪城
一歲人間艸一青
龍首寒雲常漠漠
風蒲依舊滿臨平

劉侗 二首

侗字同人麻城人
崇禎甲戌進士
除吳縣知縣
未任卒 曹潔躬云同人以文體於奇為學使置下等憤懣入太學連舉鄉會試留都亭日與于司直共輯帝京景物略文筆詭異蓋亦服習竟陵流派者

賽社詞

春社典春衣秋社饜梁肉婦子且莫嘻場熟廩不熟遼
陽方告警農助官家穀遼租十增三官租三增六里胥
登門催斛半量一斛益以雀鼠耗完數恒不足賽社報
年豐社神聽我祝但願邊患平強於倉儲蓄神保太息
言遼平爾何福糶隨遼餉加不隨遼餉復播州幾月兵
至今農噉粥

久遊復至鄂得家信將別黃宗之

出門未暑秋仍滯十度曾登送別舟久客畏聞家有信
逢人俱道邑無收衣糶不恥因良友僮僕多言怨漫遊
夜夜酒同鄉夢醒舍邊雞與渚邊鷗

陳組綬 一首

組綬字伯玉武進人崇禎甲戌進士除兵部主
事有伊菴橐

舟泊清河有攜絃索過飲者

客思紛河北商絃復漢南星光零夕霧邨柝靜虛潭去
國黃花九逢人白社三曾為記歌者不醉亦何堪

朱芾煌 五首

芾煌字玉璫無為州人崇禎甲戌進士除餘姚
知縣調樂安入為戶部主事謫補順天儒學教
授稍遷國子監博士升車駕主事歷武選郎中

有文嘻堂詩集

宋牧仲云武選樂府學長吉間出文昌玉溪間
古詩近體出入三唐要多自得能不牽於習尚

尤展成云武選詩思深而志遠 徐電發云武
選紀事之作和不流哀而不激七絕尤稱擅場

獨步文德橋

畫樓高閣不同登
雀舫鵝笙亦自憎
每日杖藜橋上立
青青雨過看鍾陵

北行江上阻風

荻港黃雲壓水流
風翻白浪打船頭
長年莫道秋江冷
楊柳堤南是酒樓

示從行汪伶

歌行作使得何戡
尚與殷勤佐酒酣
我有傷心千種恨
鷓鴣切莫唱江南

與客飲感舊

檀板牙牌事事新
小車花下自相親
勸君莫憚花前醉

舊醉花前今幾人

雜吟

賽社人稀古廟東
午烟晴裊酒旗風
游人不盡春游興
醉帽欹斜落日中

王 黃 一首

黃字元倬上元人
崇禎丙子舉人有南陔集

烟云元倬詩沉雄渾鬱頓挫瀏離大都發源於騷雅徵材於漢魏歸根於杜陵 薛諧孟云元倬忠孝之性溢於毫楮纏綿悽惻而未已 顧寧人云先生詩深以婉和而擊不失三百篇溫柔敦厚之旨 方爾止云元倬格律森嚴用意深至雖憤時嫉俗而渾然不覺

宿松風閣分韻得吟字

靄靄歲云暮
風雨恒見侵
小霽憩山閣
蕭颯吹寒霖
澗壑亂餘響
鐘鼓沈清音
蒼虬卧蜿蜒
拏攫力不任
羽觴

亦以歇剪燭聞鳴琴嘿坐得冥會擁褐成孤吟須臾微
霰集晨起雪在林樵徑斷人語四野號飢禽皎皎二三
子貞白同松心炎暉諒可俟見晁消重陰

萬泰四首

泰字履安鄞縣人崇禎丙子舉人有寒松齋

詩話孝廉鈞黨顧廚士林圭臬兵後以經史分授諸子各名一家其最著者斯大充宗斯同季野也詩多清商變徵之音羊城旅懷等作見者十手傳鈔其云廣柳車中容季布湘江澤畔問巫陽舟經彭澤竟客死舟中識者以為讖云

客中初度

朝來虎阜攬春暉矯首林泉興不違故國青山殊自好
王孫芳草幾時歸遙將兒女庭前淚灑入江湖客子衣
舉目傷心歌舞地多情楊柳故依依

釣臺有感謝皋羽遺事

當年君哭文丞相今日吾來當哭誰暮雨寒潮楓落後
朔風極浦鴈飛時兵戈未得書生力草澤偏懷故主思
如意一聲天地裂淚痕千載濕江蘼

留別董西來

客塗相見即相親總是淒涼夢裏人且喜何郎能似舅
不妨綺季未稱臣睢陽城上三生淚無定河邊後死身
惆悵天涯分手處秋高一鴈落江津

冬夜獨坐作

有客挑燈夜賦詩魂銷雨雪歲寒時黔婁私謚稱康子
文舉人推是大兒落日江邊勾踐國春風湖上岳王祠

尚然老健堪容與耐取青松百尺枝

張昉 二首

昉字于東一字匏客商丘人崇禎丙子舉人有

匏客遺詩

詩話匏客多憂生之
嗟其詩原出老杜

晚行

客路寒山暮居人各掩門荒城餘古驛落日滿前村世
亂家難料身微命敢論烽煙回首處原野已黃昏

武陵原

遠害當年早深山共卜居家耕無賦地人讀未焚書父
老衣冠古兒孫禮法疎咸陽三月火不到野田廬

徐之瑞 七首

之瑞字蘭生臨安人崇禎丙子舉人有橫秋堂

橐

詩話孝廉熟精文選五言百致
紛敷近體效韓冬郎極其綺靡

行路難

太行北上雪刺天黃河西渡冰塞川狗屠擊筑各已老
咸陽逐客還游燕烏丸夜破龍盧戍越鳥朝棲日南樹
長槍大槊取通侯安用蓬門事章句

雞鳴嶺

披榛陟山椒輒摧馬盤桓歷險未云疲逶迤入雲端仰
探巖谷俯俯視井邑殘千峰列遠戍兩崖壯重關垂蘿

蔓幽壑怪松支危垣灌木鬱蕭慘哀風嘯叢萑乘墉或
失恃務德誠所難蟋蟀在牀下我生詎遑安勞勞多苦
辛惻惻起悲歎

五十初度戲作一萬八千日歌

翔鳥夾日東方起蟋蟀大笑蜉蝣死聽我萬八千日歌
請從握算軒轅始我生不逢唐與虞我死不返鴻蒙初
以尻爲輪神爲馬手抉灑氣還虛無虎頭燕領玉關路
墮地儒冠脫相誤將軍海外御樓船坐看蚩尤蔽妖霧
漩題兩角開明堂左日右月魁中央豐霽屏翳伏不動
弧矢一星猶射狼布衣憔悴夷門客嗔目操椎大梁陌
少年躍馬氣凌雲怒血衝冠髮先白南修蛇北封狐魂

乎歸來不可處上乘白蜺游天都洞房繚繞明華燭珠
綴文軒網交綠娛光緜眇睇層波半醉雙鬢抱絲竹北
斗挹漿醪且清玉妃起舞吹鸞笙百壺一榼焉足算小
臣再拜觴千齡天門朝開誅蕩蕩劔佩雞鳴劇相向已
看恨骨委蓬蒿安用黃金鑄形像二十四氣黃鐘吹三
萬六千璇璣推元化回環貫金石丹宮玉齒生寒灰平
生豪健屠龍手蹭蹬麒麟落牛後夢中滄海幾回更勸
爾長星一杯酒

春游詞 四首

西山松柏翠成林十里橫塘水路深鷓鴣鴛鴦莫相妒
荷花香處結同心

檀槽低攏小鸞青金鴈斜飛玉手輕弟子三吳零落盡
橋頭弦索最知名

山頭擊鼓賽金錢檣上飛鳥散舞筵長記迎神送神處
石湖沙背泊郎船

龍膏千炬繞芝楹銀鑰初收玉漏傾夜冷不禁羅袖薄
雙鬟炙火更吹笙

巢鳴盛 一首

鳴盛字端明嘉興人崇禎丙子舉人有永思艸

堂集

詩話孝廉肥遯深林絕迹城市時羣盜四起鏤鐵銀鏤之器無得留者
於是遠屋種匏小大凡十餘種長如鶴頸纖若蜂腰標杓之外室中所
需器皿莫非匏者遠遯爭微之橋李匏樽不蹕而走海內
孝廉作長歌咏焉茲錄五言一律剖心剖垢蓋自喻也

題匏杯

回也資瓢飲悠然見古風剖心香自發刮垢力須攻不
識金銀氣何知陶冶工尼丘疏水意樂亦在其中

劉永錫 二首

永錫字欽爾魏縣人崇禎丙子舉人選長洲儒
學教諭署崇明縣事庭無留獄有洹水遺詩

詩話洹水至性之士兵後隱居相城有大吏強之仕袒裼疾視曰我中
原男子年二十渡漳河登大徑躍馬鳴鞘兩河豪傑誰不知我幸何欲
見辱邪取壁上所挂劍欲自剄門下士抱持之得解既而女妻相繼餓
死子為盜所傷亦死久之洹水没其弟子徐晟陳三島等經紀其喪葬
之虎丘
山塘

揚子刺船歌

白日墮兮野茫茫家千里兮來遠方壯士何時兮歸故

鄉

鼓枻歌

溯彼中流兮采其苻矣思君與父子有懷靡竟矣身為
餓夫兮天所命矣中心殷殷兮涕斯迸矣

明詩綜卷六十八

